

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY
NOV 1 6 1941

T9299 / 8125(75)

學海君道部餘分類

西周君

赤眉以劉盆子稱帝 劉永稱帝睢陽
隋楊政道立為隋王

魏立劉昶為宋王 魏立蕭寶實為齊王
齊立蕭綸為齊王 王琳立蕭莊于郢州
蕭獻據吳 蕭銑稱帝江陵

梁立元悅為魏王 齊高紹義自立

遼耶律留哥自立

學海君道部卷之二百

葦笈編

餘分類

二十四

帝王餘緒

東西二周篇

西周君章

西周桓公名揭考王弟考王元年庚子封揭於河南以續周公之職

史記考王封其弟揭于河南是為桓公以續周公之官職

正義曰自敬王

遷都成周號東周也桓公都王城號西周桓公

呂氏曰河南即郊辱周武王克商遷九鼎周公相成王營以為都是為王城又遷殷民於洛陽下都是為成周平王東遷定都於王城敬王時王子朝之亂其餘黨多在王城敬王畏之徙都成周至

哈佛大學漢和圖書館珍藏印

是考王以王城故地封其弟桓公焉稽古錄謂桓公爲東周桓公非也平王東遷之後所謂西周者豐稿也所謂東周者東都也威烈王之後所謂西周者河南也所謂東周者洛陽也河南桓公之時雖未有東西之名推本而言之謂之西周桓公則可矣何以稱河南爲西周自洛陽下都而視王城在西也何以稱洛陽爲東周自河南王城視下都則在東也君陳畢公尹般民蓋在下群之地今書皆謂之東郊則下都在王城之東明矣

威公桓公子

惠公威公子

武公惠公子

文公武公子

東周君章

惠公名班西周惠公少子也別封於鞏襲父之號

史記考王十五年崩子威烈王午立西周惠公乃封其少子於鞏

以奉王號東周惠公

索隱曰惠公長子曰西周公又封少子于鞏乃襲父號曰東周惠公於是其有東西二周也

呂氏曰此東西周公之始也初考王封其弟於河南是爲河南

桓公卒子威公立卒子惠公立至是惠公復自封其少子班於

鞏以奉王號東周自河南桓公續周公之職而秉政三世益專

所以別封其少子使奉王者殆欲獨擅河南之地而不復奉王

歟前漢地理志曰鞏非東周指威烈王所居之洛陽也鞏班之

采邑也世本曰東周惠公名班居洛陽是班秉政於洛陽而采

邑則在鞏安得遂指鞏爲東周乎當時東西周雖分治然河南

惠公既號奉王者爲東周亦必自號爲西周矣

金氏曰貞定王崩哀王立其弟惠王殺哀王自立其弟考王又弑惠王自立然少弟揭在焉使揭復迹其所爲則考王殆未保也於是封之河南是分國以處之也而揭之子孫世執其政援立威烈之初又併封其少子於東以奉王爲名於是東西二周分周亦猶三家之分魯矣考王固不得而制之也周室其時地不大於曹滕民不衆於邾莒而兄弟相殺以奪之又兄弟相分以處之是區區者果何樂乎爲君而若此紛紛也其未取滅亡幸哉

二周分治章

史記王赧時東西周分治王赧徙都西周

索隱曰西周河南也東周鞏也王赧微弱西周與東分王政理各居一都故曰東西都

正義曰敬王徙王城東從成周十世至赧王徙成周西從王城西周武公居焉

吳氏澄曰敬王四年子朝奔楚王雖返國然以子朝餘黨多在王城乃徙都成周而王城之都廢至考王封其弟揭於王城以續周公之官職是爲一西周桓公曰此以後東有王西有公而東西之名未立也桓公生威公威公生惠公惠公之少子班又別封於鞏以奉王是爲東周惠公父子同謚以鞏與成周皆在王城之東故班之兄則仍襲父爵居于王城是爲西周武公以王城在成周之西故自此以後西有公東亦有公二公各有所

食而周尚爲一也顯王二年趙韓分周地爲二二周公治之王寄焉而已矣周之分東西自此始九年東周惠公卒子傑嗣慎靚以上皆在東赧王立始遷于西周即王城舊都也史記云王赧時東西周分治今顯王二年已分爲二不待此時矣前建都以鎬京爲西周對洛邑爲東周後二公封邑以王城爲西周對成周爲東周

成都楊氏曰東西二周鮑彪東萊俱有考證亦不免訛惟吳文正公二周辯盡

秦滅二周章

史記赧王五十八年乙秦昭王使將軍樛攻西周西周君秦冉頓首受罪盡獻其邑三十六口三萬秦受其獻歸其君於周周君王赧卒周民遂東亡秦取九鼎寶器而遷西周公於患狐後七歲秦莊襄王滅東西周

索隱曰宋忠徐廣皆以周君爲西周武公非也蓋此時武公與王赧皆卒故連言也西周公蓋武公之太子文公也武公卒而立爲秦所遷而東周亦不知其名號戰國策雖有周文君亦不知滅時定當何主蓋周室衰微畧無紀錄故太史公雖考衆書以評其事然二國也系甚不分明

卮言曰西周自桓公以下本公號也自赧王西依武公亦號西周君史記云西周君奔秦下云周君王赧卒蓋一人也索隱以武公赧王連言非也西周公者武公之子文公也蓋武公之卒久矣此時文公秉政而秦遷之其後卒謚曰文耳

綱目壬子秦莊襄元秦滅東周遷其君於陽人聚

卮言曰自威烈王之初西周惠公封少子於鞏以奉王是為東周距秦滅東周之歲已百六十七年矣正義以班之子武公為秦所滅非也武公者西周公也東周之系不著國策史記諸史但謂之東周君耳

大統餘篇

劉玄立為漢帝章

更始皇帝劉玄光武皇帝族兄也初從平林起兵號更始將軍

劉玄字聖公宣帝孫春陵戴侯之曾孫也弟為人所殺玄結客欲報之客犯法玄避吏於平林吏繫玄父子張玄詐死使人持喪歸春陵吏乃出子張玄因自逃匿王莽末新市人王匡王鳳等起兵

聚眾北入南陽號新市兵皆自稱將軍七月匡等進攻隨未能下平林人陳牧廖湛復聚眾千餘人號平林兵以應之玄因往從牧等為其軍安集掾欲其安集軍眾故權以為官名是時光武及兄縯亦起春陵與諸部合兵而進癸未正月共攻莽將甄阜梁丘賜斬之平林兵中號玄為更始將軍

漢帝玄更始元年癸未春二月新市平林諸將共立更始將軍劉玄為皇帝大赦改元

時漢兵已十餘萬諸將議以兵多而無所統一欲立劉氏以從人望南陽豪桀及王常等皆欲立劉縯而新市平林將帥樂放縱憚縯威明貪玄懦弱先共定策立之然後召縯示其議縯曰諸將軍幸欲尊立宗室甚厚然今亦眉起青徐眾數十萬聞南陽立宗室

帝王制綱 卷一 五
恐赤眉復有所立王莽未滅而宗室相攻是疑天下而自損權非所以破莽也春陵去宛三百里耳遽自尊立爲天下準的使後人得承吾敝非討之善者也不如且稱王以號令王勢亦足以斬諸將若赤眉所立者賢相率而往從之必不奪吾爵位若無所立破莽降赤眉然後舉尊號亦未晚也諸將多曰善張卬拔劍擊地曰疑事無功今日之議不得有二衆皆從之二月辛巳朔設壇場於涓水上沙中玄即皇帝位南面立朝群臣羞愧流汗舉手不能言於是大赦改元更始悉拜置諸將以續爲大司徒光武爲太常偏將軍由是豪傑失望

劉氏曰玄不書漢宗室不以玄並續也書改元矣曷爲不以玄紀年大書之不成玄之爲帝也玄則何以不成之爲帝玄之不
足以君天下明矣書曰立其爲皇帝立者不宜立者也

莽棘陽長岑彭以宛城降玄入都之

岑彭守宛城漢兵攻之數月乃降更始入都之盡封宗室及諸將爲列侯者百餘人

尹氏曰前已書更始爲帝至此猶名之者更始奴材初無興漢之志群盜擁而立之向非伯升兄弟左提右挈天下必非漢有况伯升唱義反爲所殺而更始又自隨即敗滅豈足以君天下哉是以斥而名之

玄殺大司徒續以劉秀爲破虜大將軍

新市平林諸將以劉續兄弟威名益盛陰勸更始除之續部將劉稷聞更始立怒曰本起兵圖大事者伯升兄弟也今更始何爲者

帝三傳續 卷一
那更始以稷爲抗威將軍稷不肯拜更始乃與諸將陳兵數千人先收稷將誅之續固爭奈軼朱鮪因勸更始并執續即日殺之以族兄賜爲大司徒

秋劉望稱帝於汝南玄遣兵擊殺之遣上公王匡攻洛陽大將軍申屠建攻武關九月入長安衆共誅莽傳首詣宛

劉望起兵略有汝南莽將嚴尤陳茂旣敗於昆陽光武敗之往歸之望

遂自立爲帝以尤茂爲將相王莽使其太師王匡國將哀章守洛陽更始遣定國上公王匡攻洛陽西屏大將軍申屠建丞相司直李松攻武關三輔震動析人鄧曄于匡起兵應漢西拔湖莽發兵東拒曄擊之皆敗走曄開武關迎漢兵以弘農掾王憲爲校尉將數百人北度渭至頻陽所過迎降諸縣大姓各起兵稱漢將率衆

隨憲李松鄧曄引軍至華陰而長安旁兵四會城下又聞天水隗氏方到皆爭欲入城莽使史諶將兵度渭橋皆散走衆兵發掘莽妻子父祖冢燒其棺槨及九廟明堂辟雍火照城中九月戊申朔兵從宣平城門入莽避火宣室前殿群臣扶莽之漸臺衆兵上臺商人杜吳殺莽校尉東海人公賓就斬莽首持詣王憲憲自稱漢大將軍舍東宮妻莽後宮乘其車服居二日李松鄧曄入長安趙萌申屠建亦至收斬王憲傳莽首詣宛更始時在便坐黃堂取視之喜曰莽不如是當與霍光等寵姬韓夫人笑曰若不如是帝焉得之乎更始悅乃懸莽首於宛城市是月定國上公王匡拔洛陽生縛莽太師王匡哀章至皆斬之

冬十月玄北都洛

玄奮威大將軍劉信擊殺劉望於汝南并誅嚴尤陳茂郡縣皆降
更始將都洛陽以光武行司隸校尉使前修宮老吏或垂涕曰不
圖今日復見漢官威儀詳中興類光武興復章更始遂北都洛分遣使者徇
郡國以彭寵爲漁陽太守以光武行大司馬事遣徇河北劉賜爲
丞相令入關修宗廟宮室

甲申

更始二年

春二月玄遷都長安封諸功臣

申屠建李松自長安傳送乘輿服御又遣中黃門從官奉迎遷都
二年二月更始發自洛陽而西初三輔豪傑假號誅莽者人人皆
望封侯申屠建旣斬王憲又揚言三輔兒大黠共殺其主吏民惶
恐屬縣屯聚建等不能下更始至長安乃下詔大赦非王莽子他
皆除其罪於是三輔悉平更始居長樂宮升前殿即吏以次列庭

中更始羞怩俛首刮席不敢視諸將後至者更始問虜掠得幾何
左右侍官皆宮省久吏驚愕相視李松與趙萌說更始宜悉王諸
功臣更始乃先封諸宗室爲王然後立諸將王匡等爲王使朱鮪
李軼等鎮撫關東又使李通鎮荊州王常行南陽太守事
以李松爲丞相趙萌爲右大司馬

更始以李松爲丞相趙萌爲右大司馬共秉內任更始納趙萌女
爲夫人故委政於萌日夜飲燕後庭群臣欲言事輒醉不能見時
不得已乃令侍中坐帷中與語韓夫人尤嗜酒每侍飲見常侍奏
事輒怒曰帝方對我飲正用此時持事來耶起抵破書案趙萌專
權生殺自恣郎吏有說萌放縱者更始怒拔劍斬之目是無敢復
言萌私忿侍中引下斬之更始救請不從時李軼朱鮪擅命山東

王匡張卬橫暴三輔其所授官爵皆群小賈豎或有膳夫庖人多著繡面衣錦袴襜褕諸子罵詈道中長安爲之語曰竈下養中郎將爛羊胃騎都尉爛羊頭關內侯軍師將軍李淑上書諫曰方今賊寇始誅王化未行百官有司宜慎其任夫三公上應台宿九卿下括河海故天工人其代之陛下定業雖因下江平林之執斯蓋臨時濟用不可施之旣安宜釐改制度更延英俊因才授爵以匡王國今公卿大位莫非戎陳尚書顯官皆出庸伍資亭長賊捕之用而當輔佐綱維之任唯名與器聖人所重今加非其人望其毗益萬方興化致理猶緣木求魚升山採珠海內望此有以闕度漢祚臣非有憎疾以求進也但爲陛下惜此舉厝敗材傷錦所宜至慮惟割旣徃謬妄之失思隆周文濟濟之美更始怒繫淑詔獄諸將在外者皆專行誅賞各置牧守州郡交錯不知所從由是關中離心四海怨叛更始徵隗囂至長安以爲右將軍

夏五月玄立大司馬秀爲蕭王

光武攻拔邯鄲斬王郎更始遣使立光武爲蕭王悉令罷兵與諸將有功者詣行在所遣苗曾爲幽州牧常順爲上谷太守蔡充爲漁陽太守並北之部耿弇說蕭王蕭王乃辭以河北未平不就徵始貳於更始

秋公孫述自稱蜀王冬赤眉西攻長安

更始遣李寶李忠將兵徇蜀漢公孫述遣其弟恢擊破走之述遂自立爲蜀王都成都冬赤眉樊崇等將兵入潁川分其衆爲二部兩道入長安更始使王匡成丹與杭威將軍劉均等分據河東弘

農以拒之蕭王將北徇燕趙度赤眉必破長安乃遣鄧禹西入關
光武皇帝建武元年更始三年乙酉春正月方望以前定安公嬰稱帝於臨
涇玄遣兵擊斬之

平陵人方望等立前孺子嬰爲天子聚黨數千人居臨涇更始遣
丞相松等擊破皆斬之

赤眉至弘農玄遣兵擊之大敗赤眉進至湖

鄧禹至箕關擊破河東都尉進圍安邑赤眉二部俱會弘農更始
遣討難將軍蘇茂拒之茂軍大敗赤眉大集三月更始遣丞相松
與赤眉戰於務鄉松等大敗死者二萬餘人赤眉遂轉北至湖

夏六月蕭王即皇帝位鄧禹克定河東長安亂玄奔新豐

六月光武即皇帝位于鄠南鄧禹圍安邑數月未下更始大將軍
樊參將數萬人度大陽欲攻禹禹逆擊于解南斬之王匡成丹劉
均合軍十餘萬復共擊禹禹軍不利明日癸亥匡等以六甲窮日
不出甲子匡悉軍出攻禹禹進擊大破之匡等皆走禹追斬均及
河東太守楊寶遂定河東匡等奔還長安張卬與諸將議曰赤眉
且暮且至見滅不久不如掠長安東歸南陽事若不集復入湖池
中爲盜耳乃共入說更始更始怒不應莫敢復言更始使王匡陳
牧成丹趙萌屯新豐李松軍椒以拒赤眉張卬廖湛胡殷申屠建
與隗囂合謀欲以立秋日驅牒時共劫更始以成前計更始知之
托病不出召張卬等入將悉誅之惟隗囂稱疾不入會客王遵周
宗等勒兵自守更始狐疑不決卬湛殷疑有變遂突出獨申屠建
在更始斬建使執金吾鄧疊將兵圍隗囂第卬湛殷勒兵燒門入

戰宮中更始大敗囂亦潰圍走歸天水明旦更始將妻子車騎百餘東奔趙萌於新豐更始復疑王匡陳牧成丹與張卬等同謀乃並召入牧丹先至即斬之王匡懼將兵入長安與張卬等合赤眉進至華陰立劉盆子爲帝七月鄧禹自汾陰渡河入夏陽更始左輔都尉公乘歛引其衆十萬與左馮翊兵共拒禹於衙禹復破走之

八月玄復入長安九月赤眉入長安玄奔高陵

李松自振引兵還從更始與趙萌共攻王匡張卬於長安連戰月餘匡等敗走更始徙居長信宮赤眉至高陵王匡張卬等迎降之遂共連兵進攻東都門李松出戰赤眉生得松松弟况爲城門校尉開門納之九月赤眉入長安更始單騎走從厨城門出諸婦女從後連呼曰陛下當下謝城更始即下拜復上馬去侍中劉恭以赤眉立其弟自繫詔獄聞更始敗走乃出見定陶王祉祉爲之除械相與從更始於渭濱右輔都尉嚴本恐失更始爲赤眉所誅即將更始至高陵本將兵宿衛其實圍之更始將相皆降赤眉獨丞相曹竟不降手刃格死

封玄爲淮陽王淮陽王降於赤眉十二月赤眉殺淮陽王

詔封更始爲淮陽王諸將克洛陽朱鮪降十月帝都洛陽赤眉下書曰聖公降者封爲長沙王過二十日勿受更始遣劉恭請降赤眉使其將謝祿往受之更始隨祿肉袒上璽綬於盆子赤眉坐更始置庭中將殺之劉恭謝祿爲請不能得遂引更始出劉恭追呼曰臣誠力極精得先死拔劍欲自刎樊崇等遽共救止之乃赦更

始封爲畏威侯劉恭復爲固請竟得封長沙王更始常依謝祿居
劉恭亦擁護之十二月三輔苦赤眉暴雷皆憐更始欲盜出之張
卬等深以爲慮令謂祿曰今諸管長多欲篡聖公者一旦失之合
兵攻公自滅之道也於是祿使從兵與更始共牧馬於郊下因縊
殺之劉恭夜往收藏其尸詔鄧禹葬之於霸陵中

范史論曰周武王觀兵孟津退而還師以爲紂未可伐斯時有未
至者也漢起驅黠烏合之衆不當天下萬分之一而旌旃之所撓
及書文之所通被莫不折戈頓顙爭受職命非惟漢人餘思固亦
幾運之會也夫爲權首鮮或不及陳項且猶未與况庸庸者乎

袁宏論曰天生蒸民而樹之君所以司牧群黎也豈以資其私寵
養其厚大將開物成務正其性命經綸會通濟其所欲昔周秦之
末四海鼎沸義心絕於姬氏干戈加於嬴族天下無君六合無主
將求一時之傑以成撥亂之功必推百姓所與以執萬乘之柄雖
名如義帝強若西楚焉得擬議斯事乎由是觀之則高祖之有天
下以德而建矣逮於成哀之間國嗣三絕王莽乘權竊有神器然
繼體之政未爲失民劉氏德澤實繫物心故立其寢廟百姓覩而
懷舊正其衣冠父老見而垂泣其感德存念如此之深也如彼王
郎盧芳臧荼之儔耳一假名號百姓雲集而况劉氏之胄乎于斯
時也君以義立然則更始之起乘義而動號令稟乎一人爵命班
乎天下及定咸陽而立四海清舊宮而饗宗廟成爲君矣世祖經
畧受節而出奉辭征伐臣道足矣然則三王謂張作亂勤王之師
不至長安猶存建武之號已立雖南向而有天下以爲道未盡也

史斷曰更始入洛之初人心懷漢海內豪傑翕然雲合三輔豪傑莫不屬心而素無人君之器紀綱不脩遊讌無度加以諸將暴橫由是關中離心怨叛復起赤眉入關立劉盆子而更始亡矣天命有歸盆子不能自保遂歸光武焉

劉盆子立為漢帝章

劉盆子太山式人漢城陽景王之後也

劉盆子太山式人城陽景王章之後也莽天鳳戊寅琅邪人樊山崇起兵於莒號曰赤眉轉略青徐過式掠盆子及其二兄恭茂三人自隨及更始立徙都洛陽遣使降崇等聞漢復興留其兵自將渠帥二十餘人隨使者至洛陽皆封為列侯封劉恭為式侯盆子與茂留赤眉軍中屬右校卒史劉俠卿主牧牛號曰牛吏崇等雖封皆未有國邑而畱眾稍有離叛者乃復亡歸其營

光武建武元年乙酉夏六月赤眉以劉盆子稱帝

樊崇等西攻長安既入潁川分其眾為二部崇自武關徐宣自陸渾關兩道俱入會於弘農更始遣將蘇茂拒之茂軍大敗赤眉眾遂大集乃分萬人為一營凡三十營二月赤眉又敗丞相李松於務鄉遂轉北至湖六月進至華陰軍中有齋巫嘗鼓舞祠城陽景王城陽王章有誅諸呂之功故齊人祠之以求福助巫狂言景王大怒曰當為縣官何故

為賊縣官謂天子也有笑巫者輒病軍中驚動時方望第陽怨更始殺其

兄乃說崇等曰更始荒亂政令不行故使將軍得至於此今將軍擁百萬之眾西向帝城而無稱號名為群賊不可以久不如立宗室挾義誅代以此號令誰敢不從崇等以為然而巫言益甚前至

鄭乃相與議曰今迫近長安而鬼神若此當求劉氏共尊立之乃求軍中景王後得七十餘人惟茂盆子及前西安侯孝最爲近屬崇等曰聞古者天子將兵稱上將軍乃書札爲符曰上將軍又以兩空札置笥中於鄭北設壇場祠城陽景王諸三老從事皆大會盆子等三人居中立以年次探札盆子最幼後探得符諸將皆稱臣拜盆子時年十五被髮徒跣敝衣赭汗見衆拜恐畏欲啼茂謂曰善藏符盆子即齧折棄之以徐宣爲丞相樊崇爲御史大夫其餘皆列卿將軍盆子雖立猶朝夕拜劉俠卿時欲出從牧兒戲俠卿怒止之崇等亦不復候視也

秋九月赤眉入長安

赤眉入長安盆子居長樂宮諸將曰會論功爭言謹呼拔劍擊柱不能析一三輔郡縣營長遣使貢獻兵士輒剽奪之又數暴掠吏民由是皆復固守百姓不知所歸聞鄧禹乘勝而西迎軍降者日以千數十二月臘日崇等設樂大會盆子坐正殿中黃門持兵在後公卿皆列坐殿上酒未行其中一人出力筆書竭欲賀其餘不知書者起往請之各各屯聚更相背向大司農楊音按劍罵曰諸卿皆老傭也今日設君臣之禮反更殺亂兒戲尚不如此皆可格殺相拒而殺之曰格更相辨鬪而兵衆遂各踰宮斬關入掠酒肉互相殺傷衛尉諸葛穉聞之勒兵入格殺百餘人乃定盆子惶恐日夜啼泣獨與中黃門共臥起唯得上觀閣而不聞外事時掖庭中宮女猶有數百千人自更始敗後幽閉殿內握庭中蘆菔根捕池魚而食之死者因相以於宮中有故祠甘泉樂人尚共擊鼓歌舞衣服

鮮明見盆子叩頭言飢盆子使中黃門廩之米人數斗後盆子去皆餓死不出劉恭見赤眉衆亂知其必敗自恐兄弟俱禍密教盆子歸壘綬習爲辭讓之言

二年^{丙戌}春正月赤眉大掠長安西入安定北地

正月正旦崇等大會恭先曰諸君共立恭弟爲帝德誠深厚且一年肴亂日甚誠不足以相成恐死而無益願得退爲庶人更求賢知惟諸君省察崇等謝曰此皆崇等罪也恭復固請或曰此寧式侯事耶恭皇恐起去盆子乃下牀解壘綬叩頭曰今設置縣官而爲賊如故四方怨恨不復信向此皆立非其人所致願乞骸骨避賢聖路必欲殺盆子以塞責者無所離死因涕泣嗟唏崇等及會者數百人莫不哀憐之乃皆避席頓首曰臣無狀負陛下請自今

已後不敢復放縱因共抱持盆子帶以壘綬盆子號呼不得已旣罷出各閉宮自守三輔翕然稱天子聰明百姓爭還長安市里且滿後二十餘日復出大掠如故長安城中糧盡赤眉收載珍寶大縱火燒宮室市里恣行殺掠長安城中無復人行乃引兵而西衆號百萬盆子乘王車駕三馬從數百騎自南山轉掠城邑與更始將軍嚴春戰於郿破春殺之鄧禹引兵南至長安軍昆明池謁祠高廟巡行圍陵置吏士奉守

秋九月赤眉發掘諸陵復入長安

九月赤眉引兵欲西遂入安定北地至陽城番須中途大雪坑谷皆滿士多凍死乃復還發掘諸陵取其寶貨遂汗辱呂后屍凡賊所發有玉匣殮者率皆如生故赤眉得爲行淫穢鄧禹遣兵擊之

於郁夷反爲所敗禹乃出之雲陽赤眉復入長安止桂宮時漢中
延岑屯杜陵赤眉將逢安將十餘萬人擊之鄧禹以安精兵在外
惟盆子與羸弱居城中乃引兵襲長安會謝祿救至禹兵敗走延
岑及更始將軍李寶合兵數萬人與逢安戰於杜陵岑等大敗寶
遂降安而岑收散卒走寶乃使人謂岑曰子弩力還戰吾當於內
反之表裏合勢可大破也岑即還挑戰安等空營擊之寶從後悉
拔赤眉旌幟更立已旛旗安等戰疲還營見旗幟皆白大驚亂走
自投川谷死者十餘萬人逢安與數千人脫歸長安十二月二輔
大飢人相食城郭皆空白骨蔽野遺民往往聚爲營保各堅壁清
野赤眉虜掠無所得乃引而東歸衆尚二十餘萬隨道復散帝遣
將軍侯進等屯新安耿弇等屯宜陽以要其還路馮異與赤眉遇
於華陰相拒六十餘日戰十合降其將卒五千餘人

三年_{丁未}春正月馮異大破赤眉於嶠底則衆東走帝勒軍宜陽降之

詳中興
光武章

馮異大破赤眉於嶠底餘衆東向宜陽帝親勒六軍嚴陣以待之
亦眉乃遣劉恭乞降帝許之賜樊崇等洛陽田宅帝憐盆子以爲
趙王郎中賜滎陽均輸官地以爲列肆使食其稅終身

劉永立爲梁王稱帝章

劉永梁郡睢陽人漢梁孝王八世孫也傳國至父立爲王莽所滅

癸未_{更始元年}冬十月亥封劉永爲梁王

更始爲帝都洛陽永詣洛陽更始使紹封爲梁王都睢陽

甲申冬梁王永據國起兵

梁王聞更始政亂遂據國起兵招諸郡豪傑沛人周建等並署為將帥攻下濟陰山陽沛楚淮陽汝南凡得二十八城又遣使拜西陽賊帥山陽佼彊為橫行將軍是時東海人董憲起兵據其郡而張步亦定齊地永遣使拜憲為翼漢大將軍步為輔漢大將軍督青徐二州與之連兵遂專據東方

劉氏曰永者何梁王立子也有國舊矣於是莽已誅滅何以書起兵不成玄之為帝也故不成玄之為帝則書起兵而稱梁王成蕭王之為帝則削爵而稱劉永

光武建武元年乙酉冬十一月梁王永稱帝

二年丙戌夏四月遣將軍蓋延擊劉永圍睢陽秋八月蓋延克睢陽劉永走湖陵

劉氏曰前書梁王永矣此其曰劉永何稱帝也故削之曷為削之大一統也

三年丁亥夏四月睢陽人反城迎劉永蓋延引兵圍之秋七月睢陽人

斬劉永以降諸將立其子紆復稱梁王秋七月梁人斬紆以降詳中興類

光武與復章永稱帝三年稱梁王二年

後漢傳論曰傳稱盛德必百世祀孔子曰寬則得眾夫能得眾心則百世不忘矣觀更始之際劉氏之遺恩餘烈英雄豈能抗之哉然則知高祖孝文之寬仁結於人心溪矣周人之思召公愛其甘棠又况其子孫哉劉氏之再受命蓋以此乎若數子者豈有過之遠圖哉然猶以附假宗室能掘強歲月之間觀其智畧固無足以憚漢祖發其英靈者也

言王昌以下數子非漢祖之敵不足奮發英靈而憚畏之也

贊曰天地閉革野戰群龍聖公靡述假我風雲始順歸歷終然崩
分赤眉阻亂盆子探符雖盜皇器乃食均輸昌芳僭詐梁永異圖
晉南陽王保據上邽稱晉王章

南陽王模晉宣帝之從孫也

南陽王模晉宗室高密王泰之子也宣帝弟曰旭為魏曾相東武
成侯旭生彭城穆王權權及泰泰封高密王謚文獻泰四子越騰
略模模少好學與元帝及范陽王旭俱有稱於宗室初封平昌公
為中郎將惠帝未成都王穎奔長安東海王越以模為寧北將軍
都督冀州諸軍事鎮鄴永興初成都王穎故帳下督公師藩等攻
鄴廣平太守丁邵率眾救模范陽王旭又遣兗州刺史苟晞援之
落等散走光熙初遷鎮東大將軍鎮許昌進爵南陽王

懷帝永嘉元年丁卯春三月以南陽王模都督秦雍等州軍事

惠帝崩懷帝即位太傅越以詔書徵河間王顥為司徒南陽王模
遣其將梁臣邀之於新安車上扼殺之綱目書南陽王模誅河間王顥至是以模

為征西大將軍開府都督秦雍梁益諸軍事代河間王顥鎮長安

時關中饑荒盜賊公行模不能制長安其後太傅東海王越以模

不能綏撫關中表徵為司空遣中書監傅祗代之模謀臣淳于定

說模曰關中天府之國霸王之地今以不能綏撫而還既於聲望

有虧又公兄弟唱起大事而並在朝廷若自強則有專權之罪弱

則受制於人非公之利也模從之不就徵表遣世子保為平西中

郎將東羌校尉鎮上邽秦州刺史裴苞拒之模使帳下都尉陳安

率眾攻苞苞奔安定太守賈疋納之模遣軍司謝班代疋疋退奔

盧水辛未三月越卒於頃模進位太尉大都督五月漢劉曜等入寇陷洛陽遷懷帝於平陽荀藩奉秦王業趣許昌

秋七月漢劉曜寇長安南陽王模出降曜斬之遂據長安

南陽王模使牙門趙染戍蒲坂染求馮翊太守不得而怒率眾降於劉聰聰使其子粲及染攻長安染敗模兵於潼關長驅至下邳涼州將北宮純自長安帥眾降漢漢兵圍長安模遣淳于定出戰而敗倉庫虛竭士卒離散軍祭酒韋輔曰事急矣早降可以免模從之遂降於染染箕踞攘袂數模之罪送詣粲粲殺之

晉王保南陽王模之世子也模死保保上邳

南陽王保模之子也少有文義好述作初拜南陽國世子鎮上邳劉曜陷長安模被害模都尉陳安帥眾歸保於上邳模故將馮翊

太守索綝與賈疋等率眾向長安壬申四月疋等擊劉曜走之秦王業入長安疋等奉為太子以保為大司馬冬賈疋死裴苞為張軌所殺保全有秦州之地承制置百官隴右氏羌並從之涼州刺史張寔遣使貢獻癸酉春懷帝被害四月太子即位於長安是為愍帝

愍帝建興元年

癸酉

夏五月以南陽王保為右丞相督陝西諸軍事

愍帝即位以保為右丞相加侍中大都督陝西諸軍事琅邪王睿為左丞相都督陝東

所謂分陝也睿後中興江左為元帝

詔保帥秦涼梁雍之師三

十萬徑詣長安同赴大期克成元勳乙亥二月以保為相國

四年

丙子

冬十一月漢劉曜陷長安帝出降

八月劉曜逼長安保遣胡崧將兵入援擊曜於靈臺破之崧恐國

威復振則麴索執盛乃屯兵不進遂還槐里曜攻陷長安愍帝出降遷於平陽漢主聰復以曜鎮長安張寔遺保書曰王室有事不忘投軀前遣賈騫瞻公舉動中被符命敕騫還軍俄聞寇逼長安胡崧不進麴允持金五百請救於崧遂決遣騫等進軍度嶺會聞朝廷傾覆爲忠不遂今更遣韓璞等惟公命是從璞等卒不能進而還丁丑春二月琅邪王睿自稱晉王於建康

元帝大興元年

戊寅春三月

晉王聞愍帝遇害乃卽皇帝位南陽都尉陳安叛相國保舉兵逼上邽保遣使告急於張寔寔遣金城太守竇濤督步騎二萬赴之軍至新陽聞愍帝崩保謀稱尊號破羌都尉張詵言於寔曰南陽王國之疏屬忘其大體而遽欲自尊必不能成功晉王近親且有名德當帥天下以奉之寔從之遣使奉表詣建康

二年卯夏四月南陽王保自稱晉王

南陽王保自稱晉王改元建康置百官以張寔爲征西大將軍陳安自稱秦州刺史降於漢又降於成上邽大饑士衆困迫張春奉保之南安祁山張寔遣韓璞帥步騎五千救之陳安退保縣諸保歸上邽未幾保復爲安所逼寔遣其將宋毅救之安乃退

劉氏曰書自稱何譏也江東正位晉之社稷有奉矣而又必稱晉王是爭也書自譏之

三年

庚辰

夏五月上邽諸將殺晉王保保故將陳安降漢以討賊殺之

晉王保將張春楊次與別將楊韜不協勸保誅之且請擊陳安保皆不從五月春次幽保殺之保體肥大重八百斤喜睡好讀書而

暗弱無斷故及於難保無子張春立宗室子瞻爲世子穰大將軍
保衆散犇涼州者萬餘人陳安表於趙主曜請討瞻等曜以安爲
大將軍擊瞻殺之張春犇枹罕安執楊次於保柩前斬之因以祭
保安以天子禮葬保於上邽謚曰元王保稱晉王凡二年

劉氏曰書殺何不成保之爲晉王也保書殺矣殺保者曷爲書
賊予安以討賊之義也

卮言曰保晉之疏屬也而元帝爲近親固不可以並論然保與
元帝俱受分陝之任而是時中原陷沒東西隔絕則保之自王
一方亦未爲逆節而闇弱無成何取空名哉此綱目所以不削
其晉王之號而亦不成之爲晉王也

隋楊政道立爲隋王章

楊政道隋煬帝孫齊王暕遺腹子

楊政道煬帝孫齊王暕子也戊寅二月江都之亂宇文化及弑帝
又殺暕及其二子并燕王倓隋氏宗室外戚無少長皆死政道以
遺腹免惟秦王浩素與智及往來且以計全之化及立之爲帝八
月弑之自稱許帝已卯二月竇建德破化及於聊城誅之先謁隋
蕭后稱臣素服哭煬帝盡哀得隋宮人千數卽時散遣又與王世
充結好奉表於隋皇泰主

王世充立越王侗于東都改元皇泰隋封建德爲夏王

已卯隋皇泰二夏四月夏王建德立楊政道爲郎公

竇建德聞王世充自立乃絕之始建天子旌旗追謚隋煬帝爲閔
帝立隋齊王暕遺腹子政道爲郎公然猶依倚突厥以壯其兵勢
隋義成公主嫁突厥者遣使迎蕭后及南陽公主建德遣千餘騎送之

庚辰唐武德三春正月突厥立楊政道為隋王

突厥處羅可汗迎楊政道立為隋王中國士民在北者處羅悉以配之有眾萬人置百官皆依隋制居于定襄

辛巳唐武德四春三月突厥寇汾陰

唐秦王世民敗鄭主世充于穀水進圍洛陽時突厥頡利可汗士馬雄盛有憑陵中國之志其妻隋義成公主公主從弟善經避亂在突厥與王世充使者王文素共說頡利曰昔啓民奔隋賴文帝之力有此土宇子孫享之今唐天子非文皇帝子孫可汗宜奉楊政道以伐之以報文皇帝之德頡利然之乃寇汾陰五月夏主建德將兵救鄭秦王世民大破擒之鄭主世充降

唐太宗貞觀四年庚寅春二月

李靖伐突厥夜襲定襄破之頡利可汗遁走所親以隋蕭后及楊政道降

學海君道部卷之二百二十七

餘分類二

閏位餘緒一

南北朝篇

宋晉安王子勛稱帝於尋陽章

晉安王子勛孝武第三子也初爲江州刺史

晉安王子勛孝武第三子也孝武大明庚子春子勛時五歲封晉

安王食邑二千戶仍都督南兖州徐州之東海諸軍事征虜將軍

南兖州刺史癸卯改督江州南豫州之晉熙新蔡郢州之西陽三

郡諸軍事前將軍江州刺史甲辰遷使持節都督雍梁南北秦四

州郢州之竟陵隨二郡諸軍事鎮軍將軍寧蠻校尉雍州刺史未

公集之賦...
公集之賦...
公集之賦...

拜而孝武殂太子子業立子勛以鎮軍將軍還為江州刺史本官如故乙巳加使持節

乙巳

宋太子子業景和元

冬十一月宋江州刺史晉安王子勛舉兵尋陽

宋主子業任凶多所誅害前撫軍諮議參軍何邁尚宋主之姑新蔡公主宋主納主於後宮謂之謝貴嬪詐言公主薨殺宮嬪送邁第殯葬行喪禮邁素豪俠多養死士謀因宋主出遊廢之迎立子勛事泄宋主自率宿衛兵誅邁宋主又以太祖世祖在兄弟數皆第三子勛亦第三故惡之因何邁之謀使八座奏子勛與邁通謀又手詔子勛曰何邁殺我立汝汝自計孰若孝武耶可自為其所遣左右朱景雲送藥賜子勛死景雲至湓口停不進子勛典籤謝道邁主帥潘欣之侍書楮靈嗣聞之馳以告長史鄧琬泣涕請計

琬曰身南土寒士蒙先帝殊恩以愛子見託豈得惜門戶百口期當以死報效幼主昏暴社稷危殆雖曰天子事猶獨夫今便指帥文武直造京邑與羣公卿士廢昏立明耳戊申琬稱子勛教令所部戒嚴子勛戎服出廳事集僚佐使潘欣之口宣言諭之四座未對錄事參軍陶亮首請効死前驅眾皆奉旨乃以亮為諮議參軍領中兵總統軍事功曹張沈為諮議參軍統作舟艦南陽太守沈懷寶岷山太守薛常寶彭澤令陳紹宗等竝為將帥初宋主使荆州錄送前軍長史荆州行事張悅至湓口琬稱子勛命釋其桎梏迎以所乘東以為司馬琬悅二人共掌内外眾事遣將軍俞伯奇帥五百人斷大雷禁絕商旅及公私使命遣使上諸郡民丁收斂器械旬日之内得甲士五千人出頓大雷於兩岸築壘又以巴東

建平二郡太守孫冲之為諮議參軍領中兵與陶亮並統前軍移檄遠近

尹氏曰子勛何以不書及子業無道耳又遣人欲殺子勛故綱目特以舉兵書之所謂原其情而恕其罪也

宋弒其君子業而立湘東王或

宋主子業遇弒湘東王立是為明帝進子勛為車騎將軍開府儀同三司十二月江州佐吏得上所下令書皆喜共造鄧琬曰暴亂既除殿下又開黃閣實為公私大慶琬以子勛次居第三又以尋陽起事與世祖同符謂事必有成取令書投地曰殿下當開端門黃閣是吾徒事耳眾皆駭愕琬更與陶亮等繕治器甲徵兵四方袁顛既至襄陽即與諮議參軍劉胡繕修兵械簡集士卒詐稱被

太皇太后令使其起兵即建牙馳檄奉表勸子勛即大位先是廢

帝以邵陵王子元為湘州刺史中兵參軍沈仲玉為道路行事未至

洲使為道路行事公塗之事一以委之至鵠頭聞尋陽兵起不敢進琬遣數百人劫

迎之令子勛建牙於桑尾桑尾洲尾傳檄遇康彌孤志尊前典黜幽陟

明而湘東王或矯害明茂篡竊大寶于昭穆寡我兄弟貌孤同氣

猶有十三聖靈何辜而當乏饗郢州刺史安陸王子綏承子勛初

檄欲攻廢帝聞其已殞即解甲下標既而聞江雍猶治兵郢府行

事苟下之大懼郢州居江雍之間懼其夾攻以問罷兵之由即遣諮議領中兵參軍鄭

景玄帥眾馳下并送軍糧荊州行事孔道存奉刺史臨海王子瑱

會稽將佐奉太守尋陽王子房皆舉兵以應子勛

丙午宋明帝或泰始二年春正月宋遣建安王休仁討江州晉安王子勛遂稱

帝二徐司豫青冀湘廣梁益州皆應之

宋建康中外戒嚴遣司徒建安王休仁江州刺史王玄謨等帥眾以討子勛鄧琬稱說符瑞詐稱受路太后璽書帥將佐上尊號於子勛乙未子勛即皇帝位於尋陽改元義嘉將佐悉進爵號有差徐州刺史薛安都冀州刺史崔道固青州刺史沈文秀義陽內史龐孟蚪皆舉兵應尋陽宋主召尋陽王長史行會稽郡事孔顛為詹事以庾業代之又遣使者孔瑛入東慰勞瑛至反說顛發兵以奉尋陽吳郡太守顧琛吳興太守王曇生義興太守劉延熙晉陵太守袁標皆據郡應之詔又以庾業代延熙為義興業至即與延熙合又益州刺史蕭惠開聞子勛起兵集將佐謂之曰湘東太守之昭晉安世祖之穆其於當璧俱無不可但景和雖昏廢帝改本元景和

是世祖之嗣不任社稷其次猶多吾荷世祖之眷當推奉九江乃遣巴郡太守費欣壽將五千人東下於是湘州行事何慧文廣州刺史袁曇遠梁州刺史柳元怙山陽太守程天祚皆附於子隕是歲四方貢計皆歸尋陽朝廷所保惟丹陽淮南等數郡其間諸縣或應子勛豫州刺史殷琰亦率眾應之

劉氏曰尋陽前書舉兵矣此其書討何子業昏虐既已除矣社稷有奉而復尋干戈是爭也亂何時而已乎故稱帝前乎此未有書遂者此特書遂若曰舉兵於昏虐可也而遂稱帝不可也凡書遂遠辭也

尹氏曰子業無道又遣人欲殺子勛故特以舉兵書之至諸州舉兵應之亦不書反何耶子勛既世祖之子諸州奉而君之無

不可者然既不書反又胡爲以討江州書之乎夫國君不可無一亦不可有二湘東既繼大統是國已有君社稷已有奉人民已有主矣子勛前日舉兵固曰迫於強暴今既得其所託便當返旆還州告諭諸郡以國已有君之意如是則宗廟重安境內無虞豈不休哉不是之思遂乃正號稱尊則是志在爭帝非復前此避禍之意也綱目原情定罪直書曰討後宋師可舉名義正矣

三月宋臺軍敗于堵圻殷孝祖死沈攸之代將擊臺軍大破之劉氏曰江左建國久矣未有書臺軍者書臺軍何別外兵也於是子勛亦稱宋帝書宋則不知其爲誰也故曰臺軍敗臺軍者孫冲之也以自敗爲文何不以外兵加臺軍也

卮言曰子勛固孝武之子也子業忌而欲殺之故子勛起兵不爲反湘東則文帝之子也近親不如子勛故子勛稱帝不爲逆然國無二君湘東既立則子勛自當書討是時子勛年十二耳起圖大事者鄧琬所爲共拒臺軍者諸鎮所爲也事詳強藩類秋八月宋臺軍克江州殺子勛

劉氏曰江州書討矣其不書誅何子業子勛親也綱目於是有所權衡矣故舉兵應子勛者其討之也皆不名必若薛安都常珍奇衆敗降魏而後名

宋義陽王昶奔魏據彭城稱宋章

義陽王昶宋文帝第九子也初爲徐州刺史

劉昶字休道宋文帝第九子也元嘉二十二年十歲封義陽王累

官中書令散騎常侍開府廢帝子業即位出為征北將軍徐州刺史

史

宋主子業

乙巳景和元年秋九月宋義陽王昶出奔魏

義陽王昶輕訛褊急不能祇事世祖文帝素為世祖所惡而民間每

訛言昶反是歲尤甚子業謂左右曰我即大位未嘗戒嚴使人邑

邑江夏王義恭誅死昶求入朝遣典籤遽法生上表子業謂法生

曰義陽太宰謀反我正欲討之今知求還甚善又屢詰問法生義

陽謀反何故不啓法生懼禍逃還彭城子業因下詔討昶內外戒

嚴自將兵度江命沈慶之統諸軍昶即聚眾起兵移檄統內皆不

受命昶知事不成棄母妻攜愛妾一人作丈夫服亦騎馬自隨夜

與數十騎開門間行歸魏昶頗涉學能屬文魏主重之使尚武邑

公主拜侍中征南將軍駙馬都尉封丹陽王

歲餘主薨更尚建興公主

十一月

宋弒子業而立湘東王或是為明帝

丁未

宋明帝或泰始三年

冬十月宋以金贖義陽王昶于魏

宋明帝遣使以金千兩贖義陽王昶于魏魏主不許使昶與明帝

書為兄弟之儀明帝不答責昶以母為其國妾宜如春秋荀瑩對

楚彌外臣之禮魏主復使昶更為書辭昶曰臣本或兄未經為臣

若改前書事為二敬猶脩往文彼所不納臣不敢奉詔魏主從之

拜外都坐大官公主復薨更尚平陽長公主昶好犬馬愛武事入

魏歷紀猶布衣阜冠同凶素之服然呵罵僮僕音雜夷夏雖在公

坐諸王每侮弄之或戾手齧臂至於痛傷笑呼之聲聞于御聽

文每優假之不以怪問至于陳奏本國事故語及征役則歛容涕

泗悲動左右而天性褊躁喜怒不恒每至威忿楚朴特苦引待南士禮多不足緣此人懷畏避太和初轉內都坐大官

已未

齊高帝道成建元元魏孝文宏泰和三

夏四月齊王道成稱皇帝廢宋主爲汝陰

王冬十月魏遣梁郡王嘉奉丹陽王劉昶以伐齊

四月蕭道成篡齊稱皇帝廢宋主爲汝陰王徙之丹陽五月弑之齊主謂兗州刺史垣崇祖曰吾新得天下索虜必以納劉昶爲辭侵犯邊鄙壽陽當虜之衝非卿無以制此虜也乃徙崇祖爲豫州刺史十月魏主遣梁郡王嘉等分道並出奉昶伐齊許昶以克復舊業世昨江南稱藩于魏路經徐州昶哭拜其母舊堂哀感從者乃徧循故居處處隕涕左右亦莫不酸鼻

劉氏曰魏師南向未有書伐者此其書伐何惡齊也齊滅劉氏而篡其位昶劉宗也綱目書曰奉丹陽王劉昶其予魏以義舉矣

庚申春二月魏師攻齊壽陽不克而還

二月丁卯朔魏梁郡王嘉與劉昶至壽陽將戰昶四向拜將士流涕縱橫曰願同戮力以雪讎恥垣崇祖於城北堰肥水堰北築小城以備魏師攻之崇祖決堰下水魏師敗走昶以雨水方降表請還師從之又加儀同三司領儀曹尚書壬申正月魏主降定封爵昶封齊郡公加號宋王癸酉正月齊主造露車三千乘欲步道取彭城魏人知之昶數泣訴於魏主乞處邊戍招集遺民以雪私恥魏主大會公卿於經武殿以議南伐昶悲泣不已魏主亦爲之流涕乃於淮泗間大積馬芻齊主以崔慧景爲豫州刺史以備之

甲戌齊明帝鸞建武元魏泰和十八秋七月魏以宋王劉昶都督吳越楚諸軍事鎮

彭城

魏主以昶為使持節都督吳越楚諸軍事大將軍開府鎮彭城昶表辭大將軍不許及發魏主親餞之命百僚賦詩贈昶又以其文集一部賜昶其重昶如是自昶棄彭城至是久矣昔齊宇山池並尚存立昶更修繕還處其中而不能綏邊懷物撫接義故卒無成功

丁丑春三月魏宋王劄昶卒

劄言曰魏立昶為宋王其義甚正予昶以彭城其地甚重惜乎昶之不能以有為也

齊建安王寶寅奔魏為齊王反魏稱帝章

建安王寶寅明帝第六子也

建安王寶寅明帝第六子廢帝寶卷之母弟也初封建安王居石頭明帝殂寶卷嗣立寶卷無道屢誅大臣太尉陳顯達舉兵江州數其罪惡云欲奉建安王為主襲建康不克敗死寶卷益自矯恣庚辰十一月蕭衍等起兵奉南康王寶融為主廢寶卷為涪陵王

辛巳齊中興元秋七月齊雍州刺史張欣泰謀立建安王寶寅不克而死

齊涪陵王寶卷新作芳樂苑經月不出雍州刺史張欣泰與弟欣時謀結胡松及王靈秀等誅諸嬖倖廢寶卷遣中書舍人馮元嗣監軍救郢如法珍等送之欣泰等使人殺元嗣於座法珍等散走還臺靈秀詣石頸迎建安王寶寅帥城中將吏見力去車輪載寶寅文武數百唱警蹕向臺城百姓數千人皆空手隨之欣

泰聞事作馳馬入宮冀法珍等在外寶卷盡以城中處分見委表裏相應既而法珍得反處分閉門上伏不配欣泰兵鴻選在殿內亦不敢發寶寅至杜姥宅日已暝城閉門城上人射外人外人棄寶寅潰去寶寅亦逃三日乃戎服詣草市尉馳以啓寶卷寶卷召寶寅入宮問之寶寅涕泣稱爾日不知何人逼使上車仍將去制不自由寶卷笑復其爵位欣泰等皆被誅十月蕭衍圍建康十二月王珍國等弑寶卷衍入建康自爲大司馬更封寶寅爲鄱陽王壬午 梁武帝蕭衍天監元魏宣武帝恪景明二春三月齊鄱陽王寶寅出奔魏二月蕭衍進爵爲梁王殺齊邵陵王寶攸等且將盡殺齊諸王防守猶未悉鄱陽王寶寅家閹人顏文智與左右麻拱等密謀穿墻夜出寶寅具小船於江岸者烏布襦腰繫千餘錢潛赴江側躡屩

徒步足無完膚防守者至明追之寶寅詐爲釣者隨流上下十餘里追者不疑待散乃渡西岸投民華文榮家文榮與其族人天龍惠連棄家將寶寅遁匿山澗賃驢乘之晝伏夜行抵壽陽之東城魏戍主杜元倫馳告揚州刺史任城王澄以車馬侍衛迎之寶寅時年十六徒步憔悴見者以爲掠賣生口澄待以客禮寶寅請喪君斬衰之服澄遣人曉示情禮以喪兄齊衰之服給之澄帥官僚赴弔寶寅居處有禮一同極哀之節壽陽多其義故皆受慰嗻唯不見夏族一族以夏族詳從梁王故也澄深器重之及至魏宣武帝亦加禮焉四月和帝禪位于梁梁王衍稱皇帝五月梁江州刺史陳伯之集府州僚佐謂曰奉齊建安王教師江北義勇十萬已次六合我荷明帝厚恩誓死以報即命纂嚴使褚緡詐爲寶寅書

以示僚佐梁主遣王茂帥眾討之伯之兵敗亦渡江奔魏

癸未夏四月魏以蕭寶寅為齊王六月魏發兵伐梁

蕭寶寅伏於魏闕之下請兵伐梁雖暴風大雨終不斲移會陳伯

之降魏亦請兵自效魏主乃引八坐門下入定議四月朔以寶寅

為都督東揚等三州諸軍事鎮東將軍揚州刺史丹陽公齊王禮

賜甚厚配兵一萬令屯東城此蓋漢晉之東城縣以其地在壽陽之東故置東揚州以陳伯

之為江州刺史屯陽石俟秋冬大舉明當拜命其夜痛哭至晨北史

曰備禮策授賜車馬什物事從豐厚猶不及劉昶之優隆也魏主又聽寶寅募四方壯勇得數

千人以顏文智華文榮等六人皆為將軍軍主寶寅志性雅重過

碁猶絕酒肉慘形悴色蔬食麤衣未嘗嬉笑及被命南伐貴要多

相憑托門庭賓客若市而書記相尋寶寅接對報復不失其理六

月魏主詔寶寅伯之皆受任城王澄節度

甲申梁天監三年魏正始元春正月梁襲魏壽陽不克

正月魏齊王寶寅行及汝陰東城已為梁所取乃屯壽陽棲賢寺

二月梁將軍姜慶真乘澄在外襲壽陽據其外郭任城太妃孟氏

勒兵城守寶寅引兵至與州軍合擊之慶真敗走寶寅勇冠諸軍

聞見者莫不壯之及還改封梁郡公丙戌冬十月魏中山王英伐

梁進圍鍾離魏主詔邢巒引兵會之巒上表論其不可乃召巒還

更命寶寅與英同圍鍾離

丁亥秋八月魏中山王英齊王寶寅以罪除名

三月淮水暴漲梁兵攻魏中山王英齊王蕭寶寅走之七月魏有

司奏英經算失圖寶寅等守橋不固皆處以極法詔免死除名為

民尋尚南陽長公主清河王繹親而重之

辛卯梁天監十
魏正始四春三月

魏徐州刺史盧昶克梁朐山戍以琅邪戍主傅文驥守之梁師攻文驥魏主以寶寅為使持節假安南將軍將兵據朐山受昶節度寶寅受詔涕泣哽咽良久昶引兵至朐山傅文驥以城降昶敗走惟寶寅全軍而歸除瀛州刺史復其齊主遷冀州刺史及大乘賊起寶寅遣軍討之為賊所破元遙大兵至乃滅之

丙申魏孝明帝
詧熙平元夏四月梁淮堰成秋九月梁淮堰壞

魏胡太后臨朝梁將康絢於浮山堰淮以灌徐揚乃以蕭寶寅為使持節都督東討軍事鎮東將軍以拒之復封梁郡公丙申二月寶寅至浮山於堰上流更鑿新渠水乃小減又遣輕車將軍劉智

文等夜渡淮燒其竹木營攻破三壘梁主為手書招誘之使襲彭城許送其國廟及室家諸從還北寶寅表上其書陳其忿毒之意志存雪復已而淮堰成寶寅信康絢反間鑿山注水竟無功而還會梁主召康絢還淮堰始壞寶寅為殿中尚書

己亥魏神
龜二春二月

魏陳仲儒奏律准法尚書蕭寶寅奏仲儒學不師受輕欲制作事遂寢寶寅尋出為都督徐州刺史車騎大將軍乃起學館於清東朔望引見士姓子弟接以恩顏與論經義勤於聽理吏人愛之辛丑徵為尚書左僕射善於吏職甚有名

壬寅梁普通三
魏正光三冬十一月

梁主弟子西豐侯正德奔魏寶寅表曰正德既不親親安能親人

脫包此凶醜寘之列位百官是象其何誅焉臣覺結禍深痛纏膏髓日暮途遙報復無日豈區區於一豎哉但才雖庸近職居獻替愚衷寸抱敢不申陳正德既至魏人待之尤薄歲餘叛還

乙巳

魏孝昌元

春正月魏行臺蕭寶寅都督崔延伯討莫折天生敗之岐

雍隴東皆平

初秦州城人薛伯珍等反執刺史李彥推莫折大提爲秦王大提尋死其子念生竊號天子以弟天生爲高陽王天生率衆出隴東遂寇雍州乃以蕭寶寅爲開府西道行臺大都督帥諸將以討之乙巳正月天生軍於黑水軍勢甚盛魏主復遣都督崔延伯率衆繼進延伯至與寶寅軍于馬嵬延伯素驍勇寶寅趣之使戰明日癸亥延伯勒兵出寶寅舉軍繼其後天生悉衆逆戰延伯進擊大

破之追奔至小隴岐雍及隴東皆平天生塞隴道諸軍不能進寶寅破冠川俘其民以爲奴婢高平賊帥胡琛遣其將万俟醜奴等寇魏涇州盧祖遷討之不克寶寅與崔延伯引兵會祖遷于安定延伯與醜奴戰敗死寶寅退保安定丙午歲以寶寅爲侍中驃騎大將軍儀同三司假大將軍尚書令給前後部鼓吹時有天水民呂伯度本莫折念生之黨也後更據顯親以拒念生已而不勝亡歸胡琛琛資以士馬使擊念生屢破其軍復據顯親乃叛琛東引魏軍念生窘迫乞降于寶寅寶寅使左丞崔士和據秦州魏主嘉伯度立義之功以爲涇州刺史而大都督元脩義停軍不進念生復反執士和殺之久之伯度亦爲万俟醜奴所殺賊勢益盛寶寅不能制琛與念生交通事破六韓拔陵浸漫拔陵誘琛斬之醜奴

盡并其衆

丁未

梁大通元

春正月魏蕭寶寅討莫折念生敗績魏以楊椿為行臺夏

四月魏復以蕭寶寅為西討大都督

魏主以蕭寶寅為司空寶寅出兵累年將士疲弊念生擊之寶寅

大敗於涇州收散兵萬餘人屯逍遙園汧城岐州皆降於賊幽州

刺史畢祖暉戰沒關中大擾雍州刺史楊椿募兵拒守詔以椿為

行臺節度關西諸將莫折天生乘勝寇雍州寶寅部將羊仇隱身

塹中射殺之其衆遂潰寶寅還雍州二月念生據潼關魏主戒嚴

有司以寶寅之敗處以死刑詔免為庶人四月楊椿有疾求弭復

以寶寅為都督雍涇等四州諸軍事征西將軍雍州刺史開府儀

同三司西討大都督自關以西皆受節度椿還鄉里其子昱將適

洛陽椿謂之曰當今雍州亦無踰於寶寅者但其上佐朝廷應遣

心膂重臣何得任其牒用且寶寅不藉刺史為憑吾觀其得州喜

甚至於賞罰之為不依常憲恐有異心汝當以此意啓二聖

謂胡太后

與魏主并白宰輔更遣長史司馬防城都督欲安關中正須三人耳

不然必成深憂昱如言啓魏主及太后皆不聽

卒如椿所料

九月秦州

人杜粲殺念生自行州事遣使詣寶寅請降魏復以寶寅為尚書

令還其舊封

舊封者寶寅自丹陽郡公徙封梁郡公

冬十月魏蕭寶寅殺關右大使酈道元舉兵反魏遣行臺長孫稚討

之

蕭寶寅之敗於涇州也或勸之歸罪洛陽或曰不若畱關中立功

自効行臺令史馮景曰擁兵不還此罪將大寶寅不從自念出師

累年糜費不貲一旦覆敗內不自安魏朝亦疑之中尉酈道元性
 嚴猛汝南王悅嬖人弄權道元殺之并劾悅時寶寅反狀已露悅
 乃奏以道元為關右大使寶寅聞之謂為取已甚懼長安輕薄子
 弟復勸使舉兵寶寅以問河東柳楷楷曰大王齊明帝子天下所
 屬今日之舉實允人望且謠言鸞生十子九子蝦一子不蝦關中
 亂齊明帝名鸞寶寅之父也蝦卵壞也武王曰予有亂臣十人亂者治也大王當治
 關中何所疑道元至陰盤驛寶寅遣其將郭子恢攻殺之殯其尸
 表言白賊所害秦人謂鮮卑為白虜又上表自理稱為楊椿父子所譖行臺
 郎中蘇湛以病卧家寶寅令其姨弟姜儉說之曰元略受蕭衍旨
 欲見勦除略自梁還魏大見寵任故托以為言道元之來事不可測吾不能坐受死
 亡今須為是計不復作魏臣矣死生榮辱與卿共之湛大哭謂儉

曰為我白齊王王本以窮鳥投人朝廷假王羽翼以至于此乃欲
 乘人間隙守關問鼎湛不能以百口為王族滅寶寅知其不為用
 聽還武功甲寅寶寅自稱齊帝改元隆緒赦其所部置百官長史
 毛遐與弟鴻賓帥氏羌起兵拒之魏以長孫稚為行臺討寶寅正
 平民薛鳳賢薛修義亦聚眾河東據鹽池圍蒲坂東西連結以應
 寶寅詔宗正珍孫討之

胡氏曰寶寅奔魏之心本欲假其兵力為宗國復讎似也則宜
 不離淮漢之北伺間南伐死而後已若夫成功則大也冀雍二
 州豈梁所在耶而為之刺史雖曰不利人不信矣以義始以利
 終不至於作亂受戮則無能靖之道此小人之本末也

尹氏曰拓跋失御反者如蝟毛而起自鎮兵山胡與夫諸郡之

民莫不相延而動甚至寵臣如法僧宗臣如元鑒輩亦皆反叛相屬綱目悉書于冊今寶寅以羈旅寄食逃竄之臣且復稱兵造亂寇盜如此魏氏烏得不亡然寶寅始欲爲宗國復讐而終於作亂亡滅信知讐固未易復而義亦未易舉也綱目於是年書寶寅反後三年書寶寅誅不特著小人反覆交亂之禍亦以爲招納叛亡者之鑿耳蕭鸞僅有一息自取珍絕天之所廢其可興乎

戊申春正月魏長孫稚討蕭寶寅敗之寶寅奔方侯醜奴

梁中大通二年

魏建明元

春三月魏遣都督爾朱天光討方侯醜奴夏四月

之遂克高平獲蕭寶寅皆誅之

卮言曰蕭寶寅爲魏臣屬而擁兵據地固宜書反然是時魏朝大亂反者九起寶寅以南朝遺系乘時而興則亦慕容垂之於苻秦也使其能定關中以東向爭天下則綱目亦必以齊主書之而惜乎其亟滅也以蕭氏之篡國數世之暴虐卽有英哲未易復興况寶寅以逆動哉

梁武陵王紀稱帝于蜀章

武陵王紀武帝第八子也

武陵王紀字世詢梁武帝第八子少勤學有文才屬辭不好輕華甚有骨氣天監十三年甲午封爲武陵郡王邑二千戶歷位琅邪彭城會稽太守江州刺史尋授揚州刺史中書詔成武帝加四句曰貞白儉素是其清也臨財能讓是其廉也庶事無留是其勤也紀時爲武帝愛故先作牧楊州

丁巳

梁武帝大同三

秋閏九月梁以武陵王紀為益州刺史

梁武帝以武陵王紀為持節都督益梁等十三州諸軍事安西將軍益州刺史加鼓吹一部紀以路遠固辭武帝曰天下方亂惟益州可免故以處汝汝其勉之紀歔歔既出復入武帝曰汝嘗言我老我猶再見汝還益州也乙丑加散騎常侍征西大將軍開府儀同三司初天監中震太陽門成字曰紹宗梁位惟武王解者以為武王者武陵王也於是朝野屬意焉

巳巳

梁太清三

春三月侯景陷梁臺城夏五月梁主衍殂

侯景之亂湘東王繹等皆起兵討景上甲侯韶西上至碇出武帝密敕加武陵王紀侍中假黃鉞都督征討諸軍事驃騎大將軍太尉承制紀不赴援武帝殂太子即位是為簡文帝

庚午

梁簡文帝綱大寶元

夏五月梁武陵王紀遣其世子圓照將兵赴援次于

白帝

時梁境惟荆益完實武陵王紀乃移告征鎮使世子圓照帥兵三萬受湘東王繹節度圓照軍至巴水繹受以信州刺史令屯白帝未許東下九月黎州民逐刺史張賁引氏酋北益州刺史楊法琛據黎州命王賈二姓詣請法琛為刺史紀深責之囚法琛質子十一月紀帥諸軍發成都繹遣使以書止之曰蜀人勇悍易動難安弟可鎮之吾自當滅賊十二月紀遣潼州刺史楊乾運南梁州刺史譙淹合兵二萬討楊法琛法琛發兵據劔閣以拒之辛未正月乾運攻拔劔閣楊法昌退保石門乾運據南陰平二月乾運進據平興平興者楊法琛所治也法琛退保魚石洞乾運焚平興而歸

尹氏曰自蜀至臺城相去雖若甚遠然其君父陷沒亦既久矣
武陵至是方克赴援又不能親將大眾星馳而下何哉書遣世
子次于白帝罪自見矣

劉氏曰景叛三年紀乃赴援有餘罪矣故不許東下雖湘東之
命綱目直書圓照次于白帝所以誅紀心也

辛未夏六月梁湘東王繹誘江安侯圓正執之

圓正紀之子
詳元帝章

秋八月侯景廢梁主綱立豫章王棟冬十月侯景廢梁主棟僭號

建康

壬申夏四月梁武陵王紀立于成都

侯景益州長史劉孝勝等勸武陵王紀稱帝紀雖未許而大造乘
輿車服二月湘東王遣王僧辯等討景三月克建康景亡走紀勸

湘東王即尊位且迎都建業不許紀頗有武略在蜀十七年南開

寧州越雋西通資陵吐谷渾內修耕桑鹽鐵之政外通商賈遠方

之利故能殖其財用噐甲殷積有馬八千匹初聞湘東王討景謂

僚佐曰七官文士豈能匡濟

湘東于兄弟次第
七故呼爲七官

內寢柏殿柱繞節

生花紀以爲己瑞四月乙巳即皇帝位改元天正以巴西梓潼二

郡太守永豐侯撫爲益州刺史封秦郡王司馬王僧略直兵參軍

徐怿固諫不從初臺城之圍怿勸紀速入援紀意不欲行內銜之

會蜀人費合告怿反怿有與將帥書云事事往人口具紀即以爲

反徵謂怿曰以卿舊情當使諸子無恙對曰生兒悉如殿下留之

何益紀乃盡誅之梟首於市亦殺王僧略永豐侯撫歎曰王事不

成矣善人國之基也不亡何待紀徵宜豐侯參軍劉璠爲中書侍

郎使者八反乃至紀令劉孝勝深布腹心璠苦求還中紀室韋登私謂璠曰殿下忍而蓄憾足下不畱將致大禍孰若共構大厦使身名俱美哉璠正色曰卿欲諉頰於我耶我與府侯分義已定豈以夷險易其心乎殿下布厚禮下終不逞志於一夫紀知必不爲用乃厚禮遣之以宜豐侯循爲益州刺史封隋郡王以璠爲長史蜀郡太守

尹氏曰蕭紀稱帝綱目何以無貶辭釋固紀之徒也釋不能救父兄之難與紀無異紀帝于蜀釋帝于江陵紀敗而釋立若或少異然均非正嫡均爲不義綱目雖欲抑揚而去取之不可得矣宜乎書法如此

冬十一月梁湘東王繹立于江陵

癸酉

梁元帝繹承聖二年

春三月梁武陵王紀伐江陵魏遣尉遲迥伐成都以救之夏四月魏師圍成都梁武陵王紀還兵救之次于西陵

壬申八月紀舉兵由外水東下以永豐侯撫爲益州刺史守成都使其子宜都王圓肅副之十月湘東王繹稱帝于江陵癸酉三月梁主繹執侯景之俘以報紀初紀之舉兵皆太子圓照之謀也圓照時鎮巴東執畱使者啓紀云侯景未平宜急進討已聞荆鎮爲景所破紀信之趣兵東下梁主甚懼與魏書曰子糾親也請君討之魏太師宇文泰遣大將軍尉遲迥督諸軍自散關伐蜀五月紀至巴郡聞有魏兵遣譙淹還軍救蜀初楊乾運求爲梁州刺史紀以爲潼州楊法琛求爲黎州以爲沙州二人皆不悅乾運兄子略說乾運曰今侯景初平同心戮力保國寧民而兄弟尋戈此自亡

之道也夫木朽不雕世衰難佐不如送款關中可以功名兩全乾
運然之令略將二千人鎮劔閣又遣其壻樂廣鎮安州與法琛皆
潛通於魏魏以乾運爲梁州刺史尉遲迴以侯呂陵始爲前軍至
劔閣略退就樂廣翻城應始始入據安州甲戌迴至涪水乾運以
州降迴分軍守之進襲成都時成都見兵不滿萬人倉庫空竭永
豐侯撫嬰城自守迴圍之譙淹遣江州刺史景欣幽州刺史趙拔
扈援成都迴使原珍等擊走之紀至巴東聞侯景已平乃自悔召
太子圓照責之對曰侯景雖平江陵未服紀亦以旣稱尊號不可
復爲人下欲遂東進將卒日夜思歸其江州刺史王關業以爲宜
還救根本更思後圖諸將皆以爲然圓照及劉孝勝固言不可紀
從之宣言於衆曰敢諫者死己丑紀至西陵軍勢甚盛舳舻翳川
至紀所紀在舟中繞床而走以金囊擲猛曰以此顧卿送我一見
七官猛曰天子何由可見殺足下金將安之遂斬紀及其幼子圓
滿陸法和收太子圓照兄弟三人送江陵梁主絕紀屬籍賜姓贛
餐氏下劉孝勝獄已而釋之梁主使謂江安侯圓正曰西軍已敗
汝父不知存亡意欲使其自裁圓正聞之號哭稱世子不絕聲梁
主頻使覘之知不能死移送廷尉獄見圓照曰元何乃亂人骨肉
使痛酷如此圓照惟云計誤梁主並命絕食於獄至嚙臂啖之十
三日而死遠近聞而悲之魏尉遲迴圍成都五旬永豐侯撫屢出
戰皆敗乃請降迴許之八月撫與宜都王圓肅帥文武詣軍門降
梁邵陵王綸奔齊立爲梁王章

邵陵王綸武帝第五子也

蕭綸武帝第五子也初封邵陵王攝南徐州刺史

乙巳梁普通元冬十二月梁邵陵王綸有罪免官削爵土

邵陵王綸攝南徐州事肆行非法遨遊市里問賣鮓者曰刺史何如對言躁虐綸怒令吞鮓而死道路惶駭道路以目嘗逢喪車脫孝子服而着之匍匐號叫籤帥以聞梁主責之綸不能對於是遣代綸乃取一老公短瘦類梁主者以袞冕置之高坐朝以為君自陳無罪就坐剥褫捶之於庭梁主恐其奔逸以禁兵取之將賜之死太子統流涕固諫乃免綸官削爵土

史

壬子梁中大通四春二月梁邵陵王綸有罪免為庶人既而復之

邵陵王綸為揚州刺史市物不給其直市人皆閉邸店不出少府

丞何智通依事啓聞綸被責還第遣人刺殺智通事覺綸坐免

庶人鎖之於第經二旬乃脫鎖項之復封爵

戊辰梁武帝太清二秋八月梁侯景反壽陽梁主遣邵陵王綸督諸軍討之

蕭正德引侯景圍梁臺城十一月梁邵陵王綸還軍赴援侯景擊之

大潰詳中興類元帝章及創業類纂逆門侯景章

侯景反于壽陽梁王詔以郢陽王範封山侯正表司州刺史柳仲

禮等為四道都督邵陵王綸持節兼督衆軍以討景十月臨賀王

正德叛引景兵渡江遂圍臺城景以正德稱帝景自為丞相綸行

至鍾離聞景已渡采石晝夜兼道旋軍入援遂帥譙州刺史趙伯

超武州刺史蕭弄璋等步騎二萬自京口西上景遣軍至江乘拒

綸軍趙伯超曰若從黃城大路必與賊遇不如徑指鍾山突據廣

莫門出賊不意城圍必解矣綸從之夜行失道迂二十餘里庚辰旦營于蔣山景見之大駭悉送所掠婦女珍貨於石頭具舟欲走分兵三道攻綸綸與戰破之時山巔寒雪乃引軍下愛敬寺景陳約明日會戰綸許之安南侯駿見景軍退以爲走卽與壯士逐之景旋軍擊之駿敗走趣綸軍趙伯超望見亦引兵走景乘勝追擊之諸軍皆潰綸收餘兵近千入天保寺景追之縱火燒寺綸奔朱方士卒踐冰雪往往墮足景悉收綸輜重生擒西豐公大春等十二月鄱陽王範南唐王會理將兵入援散騎常侍韋粲及東西道都督柳仲禮等各以兵入援推仲禮爲大都督諸軍大集衆十餘萬諸將各有據守

己巳春三月侯景陷梁臺城邵陵王綸奔會稽

正月朔柳仲禮徙營大桁會大霧韋粲軍迷失道比至青塘立柵未合侯景亟攻之粲死焉仲禮馳往救之與景戰大破之邵陵王綸復收散卒自東道至列營桁南亦推仲禮爲大都督仲禮神情傲狠陵蔑諸將綸每日執鞭至門亦移時弗見由是與諸將有隙互相猜阻莫有戰心二月梁主以侯景爲大丞相與之盟敕止援軍湘東王繹與河東王譽桂陽王暄皆淹留不進三月景復啓陳梁主十失仲禮惟張妓置酒作樂諸將日往請戰不許梁主問策於仲禮父津對曰陛下有邵陵臣有仲禮不忠不孝賊何由平景攻城晝夜不息邵陵世子堅屯大陽門終日蒲飲不恤吏士其書佐熊曇朗等夜引景衆登城永安確力戰不能却臺城遂陷景入

城以詔命解外援軍柳仲禮召諸將議之綸曰今日之命委之將軍仲禮不答諸軍乃散綸奔會稽繹歸江陵殺桂陽王慥五月梁武帝殂子綱立是爲簡文

庚午

梁簡文大寶元

春正月梁邵陵王綸至江夏自稱都督中外諸軍承制

初邵陵王綸自鄱陽進至九江尋陽王大心以江州讓之綸不受引兵而上庚午正月綸至江夏郢州刺史南康王恪郊迎以州讓之綸不受乃推綸爲假黃鉞都督中外諸軍事承制置百官時湘東王繹遣其將鮑泉攻河東王譽譽退保長沙泉圍之岳陽王譽帥衆伐江陵以救湘州繹遣王僧辯襲襄陽營聞之遁還綸欲救譽而兵糧不足乃致書於繹求解湘州之圍繹復書陳譽過惡不救且曰綸得書投之於案慷慨流涕曰天下之事一至於斯湘州

若敗吾亡無日矣

詳中興類梁元帝章

秋九月梁湘東王繹取郢州邵陵王綸奔齊昌侯景兵襲之綸遂奔齊齊以爲梁王

邵陵王綸在郢州以廳事爲正陽殿內外齊閣悉加題署其部下陵暴軍府郢州將佐莫不怨之參軍江中舉南平王恪之謀主也說恪圖綸恪驚曰若我殺邵陵寧靜一鎮荆益兄弟必皆內喜海內恭平則以大義責我矣且巨逆未梟骨肉相殘自亡之道也卿且息之仲舉不從部分諸將刻曰將發謀泄綸壓殺之恪狼狽往謝綸曰羣小所作非由兄也克黨已斃兄勿深憂綸大修鎧仗將討侯景湘東王繹惡之八月甲午遣王僧辯鮑泉等帥舟師一萬東趣江郢聲言拒約且云迎邵陵王還江陵欲授以湘州九月王

僧辯軍至鸚鵡州郢州司馬劉龍虎等潛送質于僧辯綸聞之遣其子威正侯碩將兵擊之龍虎敗奔于僧辯綸以書責僧辯曰將軍前年殺人之姪今殺人之兄以此求榮恐天下不許僧辯送書於繹繹命進軍辛酉綸集其麾下于西國涕泣言曰我本無佗志在滅賊湘東嘗謂與之爭帝遂爾見伐今日欲守則交絕糧儲欲戰則取笑于載不容無事受縛當於下流避之麾下壯士爭請出戰綸不許與躡自食門登舟北出僧辯入據郢州綸遇將軍裴之高於道之高之子畿掠其軍器綸與左右輕舟奔武昌澗飲寺僧法馨匿綸於巖穴之下綸長史韋質司馬姜律等聞綸尚存馳往迎之說七柵流民以求糧仗綸出營巴水流民八九千人附之稍收散卒屯齊昌遣使請和于齊齊以綸爲梁王任約進攻西陽武昌綸引齊兵未至移營馬柵距西陽八十里任約聞之遣儀同叱羅子通等將鐵騎二百襲之綸不爲備策馬亡走時湘東王繹亦與齊連和故齊人觀望不助綸定州刺史田祖綸迎綸綸以祖龍爲繹所厚懼爲所執復歸齊昌行至汝南魏所署汝南城主李素綸之故吏也開城納之任約遂據西陽武昌初綸以衡陽王憲爲齊州刺史鎮齊昌任約擊擒之

辛未春二月魏攻齊汝南拔之殺其梁王蕭綸

邵陵王綸在汝南修城池集士卒將圖安陸魏安州刺史馬祐以告丞相宇文泰泰遣楊忠將萬人救安陸忠圍汝南李素戰死二月乙亥城陷執綸殺之投尸江岸岳陽王蒼取而葬之後梁稱帝江陵章

宣帝名譽武帝之孫也

蕭譽字理孫梁武帝之孫昭明太子之第三子也幼好學善屬文尤長佛義特為武帝嘉賞普通中封曲江縣公大通辛亥四月昭明太子卒封譽岳陽郡王為東揚州刺史領會稽太守

丙寅

梁武帝中大同二年

冬十月以岳陽王譽為雍州刺史

初昭明太子卒武帝捨譽兄弟而立太子綱內嘗愧之寵亞諸子以會稽人物殷阜故用譽兄弟迭為東揚州以慰其心譽兄弟亦內懷不平譽以帝衰老朝多秕政遂蓄聚貨財折節下士招募勇敢左右至數千人至是以譽為雍州刺史譽以襄陽形勝之地梁業所基遇亂可以圖大功乃克已為政撫循士民數施恩惠延納規諫所部稱治

己巳

梁簡文太清三年

春三月梁侯景陷臺城

初武帝以河東王譽為湘州刺史徙湘州刺史張縝為雍州刺史代岳陽王譽譽至留縝不遣聞侯景作亂頗陵蹙縝恐為所害輕舟夜遁將之雍部復慮譽拒之縝與湘東王繹有舊欲因之以殺譽兄弟乃如江陵及臺城陷諸王各還州鎮

夏四月梁岳陽王譽執雍州刺史張縝

湘東王繹之入援也令所督諸州皆發兵岳陽王譽遣府司馬劉方貴將兵出漢口繹召譽使自行譽不從方貴潛與繹相知謀襲襄陽未發會譽以他事召方貴方貴以為謀泄遂據樊城拒命譽遣軍攻之繹厚資遣張縝使赴鎮縝至大堤譽已拔樊城斬方貴縝至襄陽譽推遷未去但以城西白馬寺處之譽酒總軍府之政

聞臺城陷遂不受代助防杜岸給續曰觀岳陽勢不容使君不如且往西山以避禍續乃與岸結盟逃入西山答使岸將兵追禽之續乞爲沙門答許之

冬十一月梁湘東王繹遣兵攻襄陽王答乞師于魏魏遣開府楊忠率師救之

湘東王繹使鮑泉攻湘州河東王譽告急於岳陽王答答留諮議參軍蔡大寶守襄陽帥衆二萬騎二千伐江陵以救湘州湘東王繹大懼乙卯答至江陵作十三營以攻之會大雨平地水深四尺答軍氣沮繹與新興太守杜崩有舊密邀之崩遂與兄岌岸等各帥所部降于繹岸請以五百騎襲襄陽晝夜兼行去襄陽三十里城中覺之蔡大寶奉答母襲保林登城拒戰答聞之夜遁棄糧食

金帛鎧仗於澧水不可勝計答至襄陽岸奔廣平十一月答使將軍薛暉攻廣平拔之獲杜岸送襄陽殺之答既與繹爲敵恐不能自存遣使求援於魏請爲附庸魏丞相宇文泰令榮權使於襄陽使司州刺史柳仲禮鎮竟陵以圖答答懼遣其妃王氏及世子發爲質于魏宇文泰遣開府楊忠將兵擊柳仲禮以救之忠圍安陸獲仲禮遂取漢東

庚午梁大寶元夏五月魏立蕭答爲梁王梁王答入朝于魏

魏人欲令岳陽王答發哀嗣位答辭不受魏丞相宇文泰使榮權

冊命爲梁王始建臺置百官七月辛酉梁王答入朝于魏自此魏益厚答

矣九月答還襄陽辛未八月侯景廢梁主綱立豫章王棟冬十月

侯景弒望主綱廢梁主棟自稱漢帝壬申四月侯景伏誅十一月

梁湘東王繹立于江陵

甲戌

梁元帝承聖三

冬十二月魏師入江陵執梁主繹殺之

初魏太師宇文泰陰有圖江陵之

啓聞之益重其貢獻甲戌十

月魏柱國于謹至樊鄧啓帥衆食之十一月王琳軍至長沙長史

裴政請問道先報江陵至百里洲爲魏人所獲啓謂政曰我武皇

帝之孫也不可爲爾君乎若從我計貴及子孫如或不然腰領分

矣政詭對曰唯命啓鎖之至城下使言政以實告城中啓怒使速

教之蔡大業諫行釋之及城陷梁主出門啓使鐵騎擁之入營囚

于烏幔之下甚爲啓所詰辱十一月辛未梁主爲魏人所殺啓遣

尚書傅準監刑以土囊殞之葬於津陽門外并殺其諸子

以襄陽徙梁王啓使稱帝于江陵屯兵守之

魏立梁王啓爲帝資以荊州之地延袤三百里仍取其雍州之地

啓居江陵東城魏置防主將兵居西城名曰助防外示助啓備禦

內實制之以前儀同三司王悅留鎮江陵于謹等帥師西還初魏

師未還啓將尹德毅說啓曰魏虜貪林肆其殘忍殺掠士民不可

勝紀江東之人塗炭至此咸謂殿下爲之殿下旣殺人父兄孤人

子弟人盡讎也誰與爲國今魏之精銳盡萃於此若殿下爲設享

會請于謹等爲歡預伏武王因而斃之分命諸將掩其營壘大殲

群醜俾無遺類收江陵百姓撫而安之文武群寮隨材銓授魏人

懾息未敢送死王僧辯之徒折簡可致然後朝服濟江入踐皇極

晷刻之間大功可位古人云天與不取反受其咎願陛下恢弘遠

畧勿懷匹夫之行啓曰卿此策非不善也然魏人待我厚未可背

德若遠為卿計人將不食吾餘既而闔城長幼被虜又失襄陽登
乃歎曰恨不用尹德毅之言

胡氏曰魏克江陵因取襄樊之地此正滅虢取虞之計登雖悔
之何及矣

劉氏曰書以稱帝多矣未有書使者使者何敵國之辭也屯兵
所以助梁也曷為不書戍之名為助防實以制登此魏人之私
也綱目深探其情故特書守上書取襄陽下書守之存亡繼絕
之義固如是乎深譏之也

尹氏曰帝者有天下之號也自南北瓜分各帝一國已非一統
之義今又欲以蕞爾之地而帝焉何耶綱目書魏徙梁下使
稱帝烏有以帝者之尊而可使人稱之者哉直書于冊兩皆罪

也

乙亥

梁敬帝紹泰元
梁宣帝天定元

春正月梁王譽始稱帝

梁王譽即皇帝位于江陵改元大定追尊昭明太子為昭明皇帝
廟號高宗妃蔡氏為昭德皇后尊其母龔氏為皇太后立妻王氏
為皇后子歸為皇太子賞刑制度并同王者惟上疏於魏則稱臣
奉其正朔至於官爵其下亦依梁氏之舊其勳級則兼用柱國等
名以諮議參軍蔡大寶為侍中尚書令參掌選事外兵參軍蔡大
寶嚴整有智謀雅達政事文辭瞻速後梁主推心任之以為謀主
比之諸葛孔明王操亦亞之以莫勇為武州刺史魏永壽為巴州
刺史

劉氏曰庚午魏嘗欲立譽為梁帝矣譽不肯帝立為梁王蕭繹

既亡復使稱帝於是始稱故書始

梁廣州刺史王琳救江陵弗及次于長沙遣兵伐後梁

王琳將兵自小桂北下至蒸城聞江陵已陷為元帝發喪三軍編素遣別將侯平帥舟師攻後梁琳屯兵長沙傳檄州郡為進取之計長沙王韶及上游諸將皆推琳為盟主九月陳霸先殺王僧辨廢淵明復立方智為主是為敬帝

劉氏曰後梁亦梁裔也曷為書伐殺繹者魏也晉州魏立自琳視之則吾讐也琳有舊主之心焉書伐所以勸義也

丙子五月侯平頻破後梁軍以王琳兵威不接不受指揮琳遣將討之平受其眾奔江州琳軍墊益衰丁丑十月陳霸先篡梁國號陳廢方智為江陰王戊寅王琳伐陳求援于齊二月齊以琳為梁

丞相立永嘉王莊于郢州琳歸湘州己卯十二月琳伐陳而敗

梁主遣大將軍王操將兵畧取王琳之長沙武陵南平等郡

壬午後梁大定八
陳天嘉三春閏二月後梁主啓殂

周書載記曰晉少有大志不拘小節雖多猜忌而知人善任使撫將士有恩能得其死力性安於儉素不好酒色以封疆編隘邑居殘毀鬱鬱不得志每誦老馬伏櫪志在千里烈士暮年壯心不已未嘗不盱衡抱歎吒者久之疽發背而卒

明帝歸宣帝太子宣帝殂歸立

歸字仁遠晉第三子也機辨有文學善於撫御能得其下之歡心

晉稱帝立為太子晉卒周武帝又命歸嗣位年號天保見周書

丁亥後梁天保六陳光
大元司天和一秋九月周人梁人會華皎侵陳敗績

陳湘州刺史華皎遣使潛引周兵又自歸于梁陳遣安成王瑱吳明徹等襲之梁主亦上書言狀周遣襄州總管衛公直等將兵助之梁主以華皎爲司空遣柱國王操將兵二萬會之周衛公直總水陸軍與皎俱下與吳明徹戰于沌口西軍大敗皎直皆奔江陵戊子春三月陳攻江陵不克

陳吳明徹乘勝進攻江陵引水灌之梁主出鎮紀南以避之周總管高琳與梁王操守江陵晝夜拒戰十旬擊明徹敗之明徹退保公安梁主乃得還

尹氏曰梁蕞爾之地僅足以少延不滅之祀陳旣覆其宗國今又無故攻之此何義哉特書不克蓋貶之也

庚寅陳大建二秋九月陳遣兵攻梁周人救之陳師還

陳章昭達攻梁梁主告急于周周使將軍李遷哲將兵救之昭達兵不利引還

辛卯冬十二月周以基平郡州與梁

梁華皎如周過襄陽說衛公直曰梁主旣臣江南諸郡國少民貧朝廷興亡繼絕理宜資贍豈使齊桓楚莊獨擅救衛復陳之美望借數州以裨梁國真然之乃遣使言狀周主詔以基平郡三州與之

丁酉春二月梁主朝周于鄴

周平齊梁主歸朝于鄴周主雖以禮接之然未之重也歸知之後因宴承間乃陳其父荷文帝拯救之恩并叙二國艱虞唇齒倚角之事辭理辯暢因涕泗交流周主亦爲之歔歔自是大加賞異禮

遇日隆後周主復與之宴周主命琵琶自彈之仍謂歸曰當爲梁主盡歡歸乃起請舞周主曰王能爲朕舞乎歸曰陛下旣親撫五絃臣何敢不同百獸周主大悅賜雜繒萬段良馬數十匹并賜齊後主妓妾及帝所乘五百里駿馬以遣之見周書卮言曰後梁固周所立爲帝者也然旣已稱爲帝矣又禰臣于周不亦名實爽乎獨不可降號爲王乎及歸之朝周也曲盡諂諛自同百獸雖區區以自保其何面目見江東父老儼然稱尊哉

庚子

周大象二

秋九月梁遣使如周

周主贊卒隋公楊堅自爲大丞居東宮周相州總管尉遲迥舉兵討堅堅遣韋孝寬將兵擊之青州總管尉遲勤勛州總管司馬涓難各舉兵應相州梁主歸使柳莊奉書入周堅執莊手曰孤昔從沒江陵深蒙梁主承眷今猥蒙顧托當相與保歲寒耳時諸將競勸梁主舉兵應迥梁主疑未決會柳莊至具道堅語且曰昔袁紹劉表王凌諸葛誕皆一時豪傑據要地擁強兵然功業莫就禍不旋踵良由魏晉挾天子保京都仗大順以爲名故也今尉遲迥衰耄已甚司馬涓難王謙皆常人之下者非有匡合之才周朝將相兢效節於楊氏以臣科之迥等終當覆破隋公必移周祚未若保境息民以觀其變梁主然之已而尉遲迥兵敗死焉涓難奔陳

辛丑春二月周楊堅篡位國號隋

壬寅

隋文帝開皇二

冬十二月隋罷江陵總管梁主始專制其國

隋主旣立待梁主恩禮彌厚納其女爲晉王妃由是爲江陵總管

梁主始得專制其國

甲辰春正梁主入朝于隨

梁主入朝于隋服通天冠絳紗袍北西受郊勞入及入見于太興殿隋主服通天冠絳紗袍梁主服遠遊冠朝服君臣並賜嫌萬匹珍玩稱是二月乙巳隋主餞梁主於灞上

周書載記曰歸入朝長安隋文帝甚敬待之詔歸位在王公之上歸被服端麗進退閑雅天子矚目百僚傾慕帝賜歸縑萬匹珍玩稱是及還親執其手謂之曰梁主久滯荆楚未復舊都朕當振旅長相送旋反歸表謝而歸

乙巳

梁天保二十四

夏五月梁主歸殂

周書載記梁主歸臨終上表奉辭并獻所服金裝劍帝隋主覽而嗟悼歸在位二十三年謚曰孝明皇帝廟號世宗歸孝悌慈仁有君人之量性尤儉約御下有方境內安之

後主琮明帝太子明帝殂琮立

周書載記琮字溫文性倜儻不羈博學有文義兼善弓馬初封東賜王尋立爲梁太子歸卒隋主命琮嗣位賜以璽書敦勉之又賜梁之大臣璽書誠勉之琮年號廣運有識者曰運之爲字軍走也吾君將奔走乎

隋置江陵總管

梁主琮遣大將軍戚昕以舟師襲陳公安不克而還隋主徵琮叔父岑入朝拜大將軍封懷義公因留不遣復置江陵總管監之梁大將軍許世武密以城召陳將陳紀謀泄梁主誅之

丁未

梁開運二
隋開皇七

秋九月隋滅梁以其主蕭琮爲莒公

隋主徵梁主入朝梁主帥其群臣二百餘人發江陵父老莫不墮涕曰吾君其不反矣庚申至長安隋主以梁主在外遣崔弘度將兵戍江陵君至郡州梁主叔父安平王巖弟荊州刺史義興王讞等恐弘度襲之遣都官尚書沈君公詣荊州刺史宜黃侯慧紀請降九月庚寅慧紀引兵至江陵城下辛卯巖等驅文武男女十萬口奔陳隋主聞之廢梁國遣尚書左僕射安集遣民梁中宗世宗各給守家十戶拜梁主琮上柱國賜爵莒公

周書載記曰琮至隋煬帝嗣位甚見親重拜內史令改封梁公琮之宗族總麻以上並得隋才擢用於是諸蕭昆弟布列朝廷琮雖羈旅見北間豪貴無所降下常與賀若弼深友賀若弼旣誅蕭復有童謠曰蕭蕭亦復起帝由是忌之遂廢於家卒贈光祿大夫三鉉位襄城通守

梁公鉅琮弟之子琮卒隋主以鉅爲梁公

載記曰鉅小名曰藏煬帝甚昵之以爲千牛與宇文暉出入宮掖伺察內外帝每有遊宴鉅未嘗不從遂於宮中多行淫穢江都之變爲宇文化反所殺

史斷曰梁之立國大抵夷教盛行而彝倫攸斁義方不立而僭亂恣行豫章王綜以疑似萌異志而帝不知邵陵王綸以非法當被誅而竟獲免太子綱位居儲極與諸子不相下至選精兵以衛東宮而帝不之問也其後侯景之難父子不相保兄弟叔姪自相圖正德綜綸存弒逆之心繹紀譽譽無赴難之意簡文

至痛在心爲賊所脅不敢執哀而反與之宴樂凶愚貪詐惟利是圖甚者蕭繹叔父之親也誘圓止如江陵而殺之蕭譽猶子行也執元帝而辱之此其不恭不友不孝不忠萃於一家見於一時亘古以來之所罕有是夷狄之不如而禽獸類耳俾當承平且不足恃而况國已僨乎梁之有國降武迄敬閱四主爲陳霸先取之而亡然自元帝被執之後蕭譽即據有江陵遂爲後梁及歸琮更三主迄三十餘年至陳將亡而隋人始滅其國其與蜀漢之僅存國祚若相似者梁有子孫則霸先之陳殆難以接梁統而作史者乃絕後梁而進陳何哉蓋元帝武帝之子譽之季父譽昭明之子武帝之孫元帝之從子也譽爲不道以侄干叔稱藩于夷招兵入寇囚執季父居然納拜又加詰辱天理所不容矣而况譽本爲魏所立又與江左立國不相屬彼照烈之漢爲漢討賊而蕭譽之梁則爲賊於梁者也安得而比哉庖言曰梁武得國視六朝南北諸君爲後庶幾有弔伐之義焉其初固多失德而其後亦多善政雖匿於異教而慈仁恭儉亦不失爲人主之賢者侯景之亂身亡國破何其亟也及其子孫乘亂徼利日尋干戈以相魚肉自簡文而後稱帝者凡十一人不保首領者大半又何慘也然歷梁陳魏周隋之間統緒綿綿不絕如線譽能善終傳至數世亦無顯禍斯亦武帝好仁昭明好文之報歟

永嘉王莊稱帝於郢州章

梁主莊元帝之孫初封永嘉王

永嘉王莊元帝世子方等之子也江陵之陷也莊生七年矣尼漚
慕匿之王琳迎莊送之建康乙亥十二月梁陳霸先及齊將柳達
摩等戰敗之達摩請和且求質子乃以永嘉王莊為質而與齊盟
丁丑十月陳霸先稱皇帝廢梁主方智為江陰王王琳克郢州移

湘州軍府就郢城

王琳兵長沙不附陳霸先詳義師類

戊寅春正月梁王琳伐陳次于白水遣使乞師于齊

王琳引兵十萬下至湓城屯于白水浦以魯悉達為將軍陳主亦
以悉達為將軍悉達兩受之而無所就琳不敢下乃遣使求援于
齊且請納梁永嘉王莊以主梁祀

三月齊以王琳為梁丞相立永嘉王莊于郢州

三月丁酉齊發兵援送梁永嘉王莊于江南再拜王琳為梁丞相
都督中外諸軍錄尚書事琳遣兄子叔寶帥所部十州刺史子弟
赴鄴琳奉莊即皇帝位改元天啟追謚建康公淵明日閔皇帝莊
以琳為侍中大將軍書監餘依齊朝之命七月陳主遣侯瑱等帥
舟師討琳又遣謝哲往諭之琳請還湘州陳主乃詔追眾軍還已
卯三月莊至郢州遣使入貢于齊

卮言曰通鑑考異云北齊帝紀十一月丁巳琳遣使請立莊仍
以江州內屬令莊居之十二月癸酉詔莊為梁主進居九派今
從陳書及典畧然二書皆云立莊于郢州按琳時在湓城蓋始
居江州後遷郢州爾考異云然而綱目書立于郢州蓋未攷之
考異也

己卯冬十二月梁丞相琳敗陳師于湓城

王琳聞陳武帝殂乃以少府卿孫瑒爲郢州刺史總留任奉莊出屯濡須口齊師臨江爲之聲援十一月琳攻大雷陳將吳明徹夜襲淦城琳遣巴陵太守任忠擊破之因引兵東下

庚辰

陳文帝天嘉元年

春正月梁丞相王琳伐陳敗績與梁主莊皆奔齊

王琳帥舟師東下去蕪湖十里而泊齊軍屯西岸爲之聲援時西南風急琳引兵直趣建康侯埴等徐躡其後風反爲埴用琳擲火炬皆反焚其船琳軍大敗齊軍自相蹂踐陳軍乘之斬獲萬計琳走奔齊先是琳使侍中袁泌御史中丞劉仲威侍衛莊及敗左右皆散泌以輕舟送莊達于齊境拜辭而還遂降陳仲威奉莊奔齊劉氏曰奔齊書梁主何成之爲梁君也綱目書以稱帝五惟梁主莊則成之爲君曷爲成之成莊所以善琳也

庚寅

陳大建二年齊武平元年

冬十月齊以蕭莊爲梁王

齊復以梁永嘉王莊爲梁王許以興復竟不遣及齊亡莊憤悒卒于鄴

劉氏曰莊嘗稱梁矣此其斥蕭莊何失地也故削之蕭瓛復據吳州章

後梁義興王瓛世宗歸第三子也梁亡奔陳爲吳州刺史

隋書曰瓛歸三子封義興王幼有令譽能屬文位荊州刺史頗有能名隋兵至郁州瓛懼與其叔父太傅安平王巖奔陳隋遂滅梁

詳前章

陳主以蕭巖蕭瓛梁之宗室擁衆來奔心忌之故遠散其衆

以巖爲東揚州刺史瓛爲吳州刺史使任忠守吳興以襟帶二州

巴西

陳禎明三年隋開皇九年

春正月隋滅陳二月將軍宇文述拔吳東揚州執其

刺史蕭巖蕭瓛以歸殺之

蕭瓛爲吳州刺史甚得物情吳人見梁武簡文及啓歸兄弟中並第三而踐尊位瓛自以歸第三子深自矜有謝異者頗知廢興梁陳之際言無不驗江右人甚敬信之及陳主被擒瓛由是益爲衆所歸吳人推瓛爲主隋右衛大將軍帥諸軍討之燕榮以舟師自東海至陳永新侯陳君範自晉陵奔瓛并軍拒述述軍且至瓛立柵於晉陵城東畱兵拒述遣其將王褒守吳州自義興入太湖欲掩述後述進破其柵迴兵擊瓛大破之又遣兵別道襲吳州王褒衣道士服棄城走瓛以餘衆保包山在大湖中燕榮擊破之瓛將左右數人匿民家爲人所執述進至奉公埭陳州刺史蕭巖以會稽降與瓛皆送長安斬之

劉氏曰蕭巖蕭瓛驅民以奔陳者也於是巖既降隋矣歸而殺之逞忿也然則吳東揚州曷爲不書陳陳已亡也隋主怒在巖瓛而不在陳刺史也有天下而讐一夫隋主之度於是爲不弘矣綱目不書陳使若自殺其刺史者所以志隋主之褊也

梁蕭銑起兵巴陵稱帝章

蕭銑後梁中宗啓之曾孫安平王巖之孫也仕隋爲羅川令

隋煬帝大業十三年

梁鳴鳳元丁丑

冬十月蕭銑起兵巴陵自稱梁王

大業十三年春竇建德稱長樂王杜伏威據歷陽徐圓朗陷東平馬邑劉武周朔方梁師都各據郡起兵李密據洛口稱魏公薛舉起隴西稱秦帝夏唐公李淵起太原取霍邑李軌起河西稱涼王十月唐兵圍長安巴陵校尉董景珍雷世猛旅帥鄭文秀許玄徹

萬瓚徐德基郭華張繡等謀據郡叛隋巴陵郡今沔陽推景珍為主景珍

曰吾素寒賤不為眾所服羅川令蕭銑梁室之後寬仁大度請奉

之以從眾望乃遣使報銑銑喜從之聲言討賊召募得數千人會

潁川賊帥沈柳生寇羅川銑與戰不利因謂其眾曰今天下皆叛

隋政不行巴陵豪傑起兵欲奉吾為主若從其請以號令江南可

以中興梁祚以此召柳生亦當從我矣眾皆悅聽命乃自稱梁公

改隋服色旗幟皆如梁舊柳生即帥眾歸之以柳生為車騎大將

軍起兵五日遠近歸附者至數萬人遂帥眾向巴陵景珍遣徐德

基帥郡中豪傑數百人出迎未及見銑柳生與其黨謀曰我先奉

梁公勲居第一今巴陵諸將皆位高兵多我若入城反出其下不

如殺德基質其首領獨挾梁公進取郡城則無出我右者矣遂殺

德基入白銑銑大驚曰今欲撥亂反正忽自相殺吾不能為若主

矣因步出軍門柳生大懼伏地請罪銑責而赦之陳兵入城景珍

言於銑曰徐德基建義功臣而柳生無故擅殺之此而不誅何以

為政且柳生為盜日久今雖從義凶悖不移共處一城勢必為變

失今不取後悔無及銑又從之景珍收柳生斬之其徒皆潰去丙

申銑築壇燔燎自稱梁王改元鳴鳳

十二月蕭銑取豫章林士弘退保餘干

方與賊帥張善安襲陷廬江郡因渡江襲破林士弘於豫章焚其

郭郭而去士弘徙居南康蕭銑遣其將蘇胡兒襲豫章克之士弘

退保餘干是冬唐公淵克長安立伐王侑為帝自稱唐王

戊寅隋義寧二夏四月梁王銑稱皇帝書法與五月唐

唐武德元王淵稱皇帝同

三月隋宇文文化及弒煬帝於江都立秦王浩四月蕭銑卽皇帝位
置百官準梁室故事謚其從父琮爲孝靖皇帝祖巖爲河間忠烈
王父璿爲文憲王封董景珍等功臣七人皆爲王遣宋王楊道生
擊南郡下之徙都江陵修復園廟引岑文本爲中書侍郎使典文
翰委以機密又使魯王張繡徇嶺南隋將張鎮周王仁壽等拒之
旣而聞煬帝遇弒皆降於銑欽州刺史甯長真亦以鬱林始安之
地附於銑漢陽太守馮盎以蒼梧高涼珠崖番禺之地附於林士
弘銑士弘各遣人招交趾太守丘和和不從銑遣甯長真帥嶺南
之兵自海道攻和和欲出迎之司法書佐高士廉說和曰長真兵
數雖多懸軍遠至不能持久城中勝兵足以當之奈何望風受制
於人和從之以士廉爲軍司馬將水陸諸軍逆擊破之長真僅以
身免盡俘其衆旣而有驍衆自江都至得煬帝凶問亦以郡附於
銑始安郡丞李襲志遷哲之孫也隋末散家財募得士三千人以
保郡城蕭銑林士弘曹武徹迭來攻之皆不克聞煬帝遇弒帥吏
民臨三日或說襲志曰公中州貴族久臨鄙郡華夷悅服今隋室
無主海內鼎沸以公威惠號令嶺表尉佗之業可坐致也襲志怒
曰吾世繼忠貞今江都雖覆宗社尚存尉佗狂僭何足慕也欲斬
說者衆乃不敢言堅守二年外無聲援城陷爲銑所虜銑以爲工
部尚書檢校桂州總管於是東自九江西抵三峽南盡交趾北距
漢川銑皆有之勝兵四十餘萬

巳卯

隋皇泰二
唐武德二

秋八月梁主銑遣兵侵唐峽州刺史許紹擊破之

蕭銑遣其將楊道生侵峽州刺史許紹擊破之銑又遣其將陳普

環帥舟師上峽規取巴蜀紹遣其子智仁及錄事參軍李弘節等

追至西陵今夷陵州大破之擒普環銑遣兵戍安蜀城在公安縣界及荆門

城先是唐主遣開府李靖詣夔州經略蕭銑靖至峽州阻銑兵久

不得進唐主怒其遲留陰敕許紹斬之紹惜其才為之奏請獲免

庚辰冬十二月唐峽州兵伐梁拔荆門鎮

梁主蕭銑性褊狹多猜忌諸將恃功恣橫好專誅殺銑患之乃宣

言罷兵營農實欲奪諸將之權大司馬董景珍弟為將軍怨望謀

作亂事泄伏誅景珍時鎮長沙銑下詔赦之名還江陵景珍懼甲

子以長沙降唐唐主詔峽州刺史許紹出兵應之十二月癸卯紹

攻銑荆門鎮拔之銑遣其齊王張繡攻長沙董景珍謂繡曰前年

醢彭越往年殺韓信卿不見之乎何為相攻繡不應進兵圍之景

珍欲潰圍走為麾下所殺銑以繡為尚書令繡恃功驕橫銑又殺

之由是功臣諸將皆有離心兵勢益弱

辛巳唐武德四年春正月唐黔州兵攻梁拔其五州四鎮

正月丙戌黔州刺史田世康攻梁五州四鎮皆克之

冬十月唐遣趙郡王孝恭李靖伐梁梁主銑降

李靖說趙郡王孝恭以取蕭銑十策孝恭上之二月辛卯改信州

為夔州以孝恭為總管使大造戰艦習水戰以孝恭未更軍旅以

李靖為行軍總管兼孝恭長史委以軍事靖說孝恭悉召巴蜀酋

長子弟量才授任置之左右外示引權實以為質六月黃州總管

周法明攻梁安州今安陸州拔之十月唐主詔發巴蜀兵以孝恭為荆

湘道行軍總管李靖攝行軍長史統十二總管自夔州順流東下

以廬江王瑗爲荆郢道行軍元帥田世康出辰州道周法明出夏口道以擊銑是月孝恭發夔州時峽江方漲諸將請俟水落進軍李靖曰兵貴神速今吾兵始集銑尚未知若乘江漲倏忽抵其城下掩其不備此必成擒不可失也孝恭從之辛卯銑鄂州刺史雷長頴以魯山降唐趙郡王孝恭帥戰艦二千餘艘東下銑以江水方漲殊不爲備孝恭等拔其宜都荆門二鎮進至夷陵銑將文士弘將精兵數萬屯清江癸巳孝恭擊走之獲戰艦三百餘艘殺溺死者萬計追奔至百里士弘收兵復戰又敗之進入北江銑江州總管袁彥舉以五州降銑之罷兵營農也纔畱宿衛數千人聞唐兵至文士弘敗大懼倉猝徵兵皆在江嶺之外道塗阻遠不能遽集乃悉見兵出拒戰孝恭將擊之李靖止之曰彼救敗之師策非素立勢不能久不若且泊南岬緩之一日彼必分其兵或畱拒我或歸自守兵分勢弱我乘其懈而擊之蔑不勝矣今若擊之彼則併力死戰楚兵剽銳未易當也孝恭不從畱靖守營自帥銳師出戰果敗走趨南岬銑衆委舟收掠軍資人皆負重靖見其衆亂縱兵奮擊大破之乘勝直抵江陵入其外郭又攻水城拔之大獲舟艦李靖使孝恭盡散之江中諸將皆曰破敵所獲當藉其用奈何棄以資敵靖曰蕭銑之地南出嶺表東距洞庭吾懸軍深入若攻城未拔援軍四集吾表裏受敵進退不獲雖有舟楫將安用之今棄舟楫使塞江而下援兵見之必謂江陵已破未敢輕進往來覘伺動淹旬日吾取之必矣銑援兵見舟艦果疑不進其交州刺史丘和長史高士廉司馬杜之松將朝江陵聞銑敗悉詣孝恭降孝

恭勒兵圍江陵銑內外阻絕問策於中書侍郎岑文本文本勸銑降銑乃謂羣下曰天不祚梁不可復支矣若必待力屈則百姓蒙患奈何以我一人之故陷百姓於塗炭乎乙巳銑以太牢告於太廟下令開門出降守城者皆哭銑帥羣臣總纓布幘詣軍門曰當死者唯銑耳百姓無罪願不殺掠孝恭入據其城諸將欲大掠岑文本說孝恭曰江南之民自隋末以來困於虐政重以羣雄虎爭今之存者皆鋒鏑之餘跣踵延頸以望其生是以蕭氏君臣江陵父老決計歸命庶幾有所息肩今若縱兵俘掠恐自此以南無復向北之心矣恭稱善遽禁止之諸將又言梁之將帥與官軍拒鬪死者其罪既請籍沒其家以賞將士李靖曰彼爲其主鬪死乃忠臣也豈可同逆之科籍其家乎於是城中安堵秋毫無犯

南方州縣聞之皆望風款附銑降數日援兵至者十餘萬聞江陵不守皆釋甲而降孝恭送銑於長安唐主數之銑曰隋失其鹿天下共逐之銑無天命故至此若以爲罪無所逃死竟斬於都市

范氏曰蕭銑故梁子孫因隋之亂保據荆楚欲復先業非唐之叛臣也唐師伐之銑又以百姓之故不忍固守而降然則唐初割據之主銑最無罪高祖誅之淫刑甚矣

胡氏曰蕭銑志復舊業非唐叛臣唐若以文告之辭招而撫之再三不下然後用兵既服其人當矜其志胙以江南百里之國使奉梁祀則唐之德庶幾乎武王下車之政矣而以盜賊待之必殺之而後慊不仁甚矣

劉氏書法曰唐主斬銑都市綱目何以不書諱之也唐平諸國

雖降鮮不殺者淫刑甚矣然薛仁果貪暴劉黑闥執降猶曰有以藉口故綱目悉書之惟王行本蕭銑不書不忍書也其不忍何行本各爲其主蕭銑自紀其叙皆既降矣而復斬之諱之者甚之也

卮言曰梁武子孫皆安忍狼戾據鎮分爭歸附北朝稱帝一隅及乘亂自尊者凡五國何其盛也梁書云蕭紀據庸蜀之資不勤王赴難申臣子之節及賊景誅翦方始起兵師出無名成其釁身當管蔡之罰益自貽哉綸聰警有才學性險躁屢以罪黜及太清之亂忠孝獨存斯可嘉矣後周書云梁主營任術好謀知賢養士益有英雄之志霸王之略焉及淮海版蕩骨肉猜貳_誅衆自固稱藩內款終能據有全楚中興頽運雖土宇殊於舊

邦而位號同於曩日貽厥自遠享國數世可不謂賢哉嗣子纂承舊業增修遺構賞罰得中舉措有方密邇寇讐則威略具舉朝宗上國則聲猷遠振豈非繼世之令主乎由諸史觀之則綸之晚節譽之雄才歸之守業皆有足述者其建國延祀非苟然也噫得物情銑負衆望陳隋之末因亂樂推志圖恢復漢昭烈而後益僅見焉銑巖旣降而隋唐殺之先儒以爲不仁然無辜受戮豈亦譽不仁之報至此而後應歟

學海君道部卷之二百二十八

餘分類三

閏位餘緒二

北朝篇

魏北海王顥奔梁立為魏王章

魏王顥獻文帝之孫也

魏北海王顥之父曰詳是為獻文第七子封北海王卒謚平王顥襲爵少慷慨有壯氣除龍驤將軍通直散騎常侍累遷撫軍將軍徐州刺史尋為御史彈劾除名孝昌元年乙巳夏賊帥宿勤明達等寇亂幽華諸州仍復顥王爵都督華幽東秦諸軍事西道行臺以討之顥轉戰而前頻破賊眾解幽華之圍以功增封八百戶進

號征西將軍除尚書右僕射直蕭寶寅敗於平涼顥亦奔還京師

戊申

梁大通二魏孝昌四

夏四月魏汝南王悅臨淮王彧北海王顥出奔梁

正月魏太后詔以顥為侍中驃騎大將軍開府儀同三司相州刺

史三月爾朱榮舉兵晉陽夏四月至河陽立長樂王子攸

子攸亦獻文之

孫彭城王之

而沈太后胡氏及幼主釗于河殺王公以下二千八人為

都督封太原王遂入洛陽奉子攸詔授顥太傅侍中開府刺史王

並如故顥將之相州至汲郡聞葛榮南侵及爾朱榮縱暴陰為自

安之計盤桓不進以其舅殷州刺史范遵行相州事代前刺史李

神守鄴行臺甄密知顥有異志相帥廢遵復推李神攝州事遣兵

迎顥且察其變顥聞之遂與子冠帥左右奔於梁

冬十月梁立元顥為魏王遣將軍陳慶之將兵納之

北海王顥見梁主衍泣涕自陳言辭壯烈梁主奇之冬十月以顥

為魏王遣東宮直閣將軍陳慶之將兵送之還北顥襲鉉城而據

之

通鑑考異曰梁魏帝紀皆云以顥為魏主惟顥傳作魏王按魏

封劉昶為宋王蕭寶寅為齊王蕭詧為梁王皆俟得國然後使

稱帝耳若顥在南已稱魏帝當行即位之禮又梁朝應以客禮

待之又顥不應再即位於渙水蓋一字之誤今從顥傳

尹氏曰跣跋雖亂然長樂已正尊位是其國未嘗無君也梁主

乃立元顥又遣兵送之何義哉書遣將兵納之納者不順之詞

如春秋書莊公伐齊納糾之類若曰彼不受而此強以兵納之

謂也

巳酉

梁中大通元魏
主子攸永安二

夏五月魏王顥拔榮城稱皇帝

正月魏主子攸詔濟陰王暉業都督丘大千等鎮梁國三月元天
穆將擊邢杲以顥北上乃集文武議之眾皆曰杲眾強盛宜以爲
先薛琚曰邢杲兵眾雖多非有遠志顥帝室近親來稱義舉其勢
難測宜先去之眾皆以顥孤弱不足慮命天穆等先定齊地還師
擊顥遂引兵東出顥與陳慶之乘虛自鉅城進拔榮城遂至梁國
丘大千有眾七萬八築九城以拒之慶之攻之自旦至申拔其三
壘大千請降顥登壇燔燎卽帝位於睢陽城南改元孝基濟陰王
暉業率羽林兵二萬守考城慶之攻拔其城擒暉業

劉氏曰不書自立書稱何不予顥之自稱也社稷有主而仗讐
國以伐其宗是爭也故綱目終顥之身稱魏王

五月魏王顥取梁國榮陽虎牢

五月戊辰顥克梁國以陳慶之爲徐州刺史引兵而西大都督楊
昱擁眾七萬據榮陽慶之攻之未拔顥遣人說昱使降昱不從元
天穆旣平邢杲與爾朱吐沒兒將兵繼至梁士卒皆恐慶之諭之
急使登城癸酉拔榮陽執陽昱俄而天穆等引兵圍城慶之帥騎
三千背城力戰大破之天穆吐沒兒皆走慶之進擊虎牢爾朱世
隆弃城走獲魏東中郎將辛纂

魏主子攸奔河內顥入洛陽以陳慶之爲車騎大將軍

魏主子攸出避顥走入河內臨淮王彧安豐王延明帥百僚封府
庫備法駕迎顥丙子顥入洛陽宮改元建武以陳慶之爲車騎大
將軍上黨王天穆等帥眾四萬攻拔大梁分遣費穆將兵二萬攻

虎牢顥使陳慶之擊之天穆引兵北走渡河費穆攻虎牢將拔聞
天穆走遂降慶之進擊大梁梁國皆下之慶之以數千之衆自發
鉅縣至洛陽凡取三十城四十七戰所向皆克顥使黃門郎祖瑩
作書遺子攸曰朕泣請梁朝誓在復耻正欲問罪於爾朱出卿於
虎口耳桎梏卿托命豺狼委身虎口假獲民地本是榮物固非卿
有今國家隆替在卿與我若天道助順則皇魏載興脫或不然在
榮爲福分卿爲禍卿宜三復富貴可保顥旣入洛自河以南州縣
多附之

尹氏曰子攸何以名失地之君也况是時顥旣稱帝若直書魏
主則不知其孰爲顥孰爲子攸故名以別之耳

六月魏都督費穆伏誅

費穆至洛陽魏主顥責以河陰之事而殺之

劉氏曰誅穆者顥也不成顥之爲帝則曷爲以誅書河陰之役
穆助榮爲虐是亦賊而已矣逆賊人得而誅之

閏月魏爾朱榮渡河魏主顥走死

提要王
並書主

尹氏曰顥未成乎君而亦以魏主書之顥固子攸之類也使顥
有成則一子攸子攸無成亦一顥耳故等而書之

魏王悅孝文第六子也初封汝南王

汝南王悅孝文帝第六子也初封汝南王好讀佛經覽書史爲性
不倫倣儻難測魏正光元年七月侍中元叉殺悅兄清河王懌幽
胡太后於北宮遂與高陽王雍等同輔政悅了無恨叉之意以桑
落酒侯之盡其私伎又大喜十月叉以悅爲侍中太尉悅就懌子

賈求懌服玩不時稱旨攸賈百下幾死爾朱之亂悅奔於梁

庚戌梁中大通二夏六月梁以元悅為魏王

初梁主納顥為魏王悅未還國梁主許之顥走死魏主子攸歸洛

陽六月丁巳梁主復以悅為魏王庚申梁主以魏降將范遵為安

北將軍司州牧從悅北還范遵北海王顥之舅八月庚戌梁主餞

悅於德陽堂遣兵送至境上考異曰悅傳云立為魏主年號更興

素依附榮榮死椿懼聞悅在境上乃帥部眾棄州歸悅悅授椿侍

中大將軍封靈丘郡公又為大行臺前驅都督爾朱世隆等立長

廣王曄于長子十二月入洛陽廢子攸於晉陽而弑之悅改元更

興聞爾朱兆已入洛自知不及事遂南還椿復棄悅奔魏辛亥二

月爾朱世隆廢曄而立廣陵王恭七月高歡起兵討爾朱立勃海

太守元朗自為丞相壬子正月梁主以薛法護為司州牧衛送悅

入洛三月魏主朗入居于鄴爾朱天光等會兵攻鄴四月斛斯椿

執天光於河橋世隆伏誅歡入洛陽廢恭及朗以悅高祖之子召

欲立之聞其狂暴無常乃止考異曰魏書悅傳云神武以悅高祖

境比召至洛往返幾日蓋神武聞其所為而止耳

壬子梁中大通四冬十二月魏主殺汝南王悅

魏主以汝南王悅為侍中大司馬十二月丁亥魏主以悅屬尊地

近故殺之

齊范陽王紹義稱帝於北朔章

范陽王紹義文宣第五子也

范陽王紹義文宣帝第三子也初封廣陽徙封范陽歷任侍中清河郡尹後主隆化元年丙申十二月周師伐齊後大敗走晉陽遂犇鄴以紹義為尚書令定州刺史

丁酉春正月周滅齊齊廣寧王孝珩任城王湝起兵信都州齊王寧伐而執之

正月後主緯傳位于太子恒周師圍鄴緯出走周主人鄴追緯及恒獲之遂滅齊二月齊廣寧王孝珩任城王湝起兵信都共謀匡復不克周主以齊降將封輔相為北朔州總管州齊之重鎮士卒驍勇前長史趙穆司馬王當萬等謀執輔相迎任城王湝於瀛州不果乃迎范陽王紹義至馬邑自肆州以北二百八十餘城皆應之紹義與靈州刺史表洪猛引兵南出欲取并州至新興而肆州

已為周守

肆州新興皆在樓煩郡

前隊二儀同以所部降周

二人為前隊之將

周兵

擊顯州執刺史陸瓊復攻拔諸城紹義還保北朔州周東平公宇文神舉將兵逼馬邑紹義遣杜明達拒之兵大敗遂奔突厥猶有眾三千人紹義令曰欲還者從其意於是辭去者太平突厥佗沐可汗嘗謂齊顯祖為英雄天子以紹義重蹀似之甚見愛重凡齊人在北者悉以隸之於是齊之行臺州鎮惟東營州行臺傳伏營州刺史高寶寧不下其餘皆入於周周主西還使人招伏伏知齊已滅亦降於周高寶寧者齊之踈屬有勇略久鎮和龍甚得夷夏之心

冬十二月齊范陽王紹義禰帝於北朔州

高寶寧自黃龍上表勸進於高紹義紹義遂稱皇帝改元武平以

寶寧為丞相突厥佗鉢可汗舉兵助之

戊戌周宣政元閏六月高紹義入幽州周人討之紹義奔突厥

齊范陽王紹義聞周高祖殂以為天助幽州人盧昌期起兵據范

陽迎紹義紹義引突厥兵赴之周遣柱國東平公神舉將兵討昌

期紹義聞幽州總管出兵在外欲乘虛襲薊神舉遣大將軍宇文

恩將四千人救之半為紹義所殺會神舉克范陽擒昌期紹義聞

之素衣舉哀還入突厥高寶寧帥夷夏數萬以救范陽未至還據

和龍

劉氏曰梁為陳篡蕭莊稱帝綱目成其為君書梁主莊繼絕之

義也紹義亦莊比也其名紹義且書討何惡齊也梁為無罪陳

篡之不義也齊有大惡周伐之義也一予一奪惟其義而已矣

故終其身斥高紹義也

庚子周大象二秋七月突厥執齊高紹義歸之於周

周送千金公主於突厥遣賀若誼賂佗鉢可汗以求高紹義佗鉢

偽與紹義獵於南境使誼執之紹義至長安徙蜀病死

劉氏曰紹義嘗書討而削其國矣此其復書齊何終暴齊之餘

孽也以爲予其不忘本朝者過矣

尹氏曰齊已滅矣猶書曰齊高紹義亦所以遂其公不忘本朝之

志云爾

五季篇

後唐許王從益稱帝於大梁章

許王李從益明宗之子也

李從益明宗之子也母曰王淑妃從益初封許王丙申未帝從珂清泰三年

二月契丹立石敬瑭為晉帝引兵至河陽末帝從珂與曹太后劉

皇后雖王重美等自焚王淑妃謂太后曰事急矣宜且避匿以俟

姑夫太后巨吾子孫婦女一旦至此何忍獨生妹自勉之淑妃乃

與從益匿於毬場獲免帝后皆焚死

戊戌晉天福四秋九月晉以唐許王從益為郇國公

晉主以從益為郇國公奉唐祀從益尚幼李后養從益於宮中奉

王淑妃如事母

劉氏曰書唐何予存厚也不絕唐祀晉於是為庶幾矣

未晉天福十二春正月契丹德光入大梁封晉主重貴為負義侯徙之

龍府二月契丹以李從益為許王

契丹主入大梁滅晉以趙延壽為中京留守晉河東節度使劉知

遠稱帝於晉陽唐王淑妃與郇公從益居洛陽趙延壽娶明宗女

為夫人淑妃詣大梁會禮契丹主見而拜之曰吾嫂也統軍劉遂

凝因淑妃求節鉞契丹主以從益為許王威信節度使遂凝為安

遠節度使淑妃以從益幼辭不赴鎮復歸於洛

夏六月契丹將蕭翰劫李從益稱帝於大梁遂北走從益避位

契丹主北歸以蕭翰為宣武節度鎮汴州四月契丹主行至殺胡

林而卒蕭翰聞劉知遠擁兵而南欲北歸恐中國無主必大亂已

不得從容而去遂遣高謨翰迎從益母子於洛矯契丹主命以從

益知南朝軍國事召已赴恒州淑妃從益匿於徽陵下宮不得已

而出至大梁翰立以為帝帥諸酋長拜之又以禮部尚書公衛

史中丞趙遠爲宰相前宣徽使翟光鄴爲樞密使左金吾大將軍
王景崇爲宣徽使以北來指揮使劉祚權侍衛親軍都指揮使克
在京巡檢百官謁見淑妃淑妃泣曰吾母子單弱如此而爲諸公
所推是禍吾家也翰留兵千人守諸門爲從益宿衛壬寅翰及劉
時辭行從益餞於北郊遣使召高行周於宋州武行德於河陽皆
不至淑妃懼召大臣謀之曰吾母子爲蕭翰所逼分當滅亡諸公
無罪宜早迎新主自求多福勿以吾母子爲意衆感其言皆未忍
叛去或曰今集諸營不滅五千與燕兵併力堅守一月北救必至
淑妃曰吾母子亡國之餘安敢與人爭天下不幸至此生死惟人
所裁若新主見察當知我無所負今更爲計畫則禍及它人闔城
塗炭終何益乎衆猶欲拒守三司使劉審父曰余燕人豈不爲燕
兵計顧事有不可如何者今城中大亂之餘公私窮竭遺民無幾
若復受圍一月無噍類矣願諸公勿復言一從太妃處分乃用趙
遠翟光鄴策稱梁王知軍國事遣使奉表稱臣迎知遠請早赴京
師仍出居私第

六月晉主知遠入洛陽遣使殺李從益

六月丙辰晉主知遠入洛陽汴州百官奉表來迎命郭從義先入
大梁密令殺李從益及王淑妃淑妃且死曰吾兒何罪而死何不
留之使每歲寒食以一盂麥飯灑明宗陵乎聞者泣下

胡氏曰從益本爵許王以稱號於大梁自稱梁王是已建國更
號矣今旣奉表迎漢何爲又更國號是當時議者禍之也

劉氏曰書李從益何劫立且避位也亦旣稱臣表迎而必殺之

過矣故止書李從益以為是一夫也徒殺不辜而已耳

後北朝篇

西遼耶律大石稱帝於北庭章

德宗皇帝耶律大石遼太祖八世孫也遼主延禧為金人所攻走雲

中大石立耶律淳為帝詳于名類後復歸遼

耶律大石太祖八世孫也通遼漢字善騎射丙申登進士第擢翰

林應奉尋陞承旨遼以翰林為林牙故稱大石林牙歷泰祥二州

刺史遼興軍節度使壬寅三月天祚為金兵所逼走雲中大石與

諸大臣立秦王淳為帝軍旅之事悉委大石六月淳卒大石與蕭

幹等立淳妻為皇太后以守燕十二月金人克燕京大石以勁兵

守居庸門蕭后奔天德遼主怒殺之追降淳為庶人癸卯金兵至

居庸遂禽大石至青塚以繩繫大石使為卿導直趨遼主營時遼

主往應州子女從臣皆被執遼主犇夏蕭特烈等立其子雅里為

主十月雅里沒復立即律木烈為眾所殺甲辰七月遼主復自夏

渡河居於突呂不部大石自金來歸遼主責之曰我在汝如何敢

立淳大石對曰陛下以金國之勢不能一拒敢棄國遠遁使黎民

塗炭即立十淳皆太祖子孫豈不勝乞命於他人邪遼王無以答

賜酒食而赦之金襲遼主營遼主北走有謨葛失者迎至其部遼

主得大石及謨葛失之自謂有天助再謀出兵收復燕雲大石

諫曰向以全師不謀戰備伊皆為金有國勢至此而方求戰

非計也當養兵待時而動不可輕舉遼主不從與金人戰敗走山

陰大石不自安遂殺蕭乙薛坡里括自立為王率鐵騎二百宵遁

北行三日過黑水見白達達詳穩牀古兒獻馬四百馳二十羊若
干西至可敦城駐北庭都獲府

宋徽宗宣和七年

遼天祚十
二乙巳

春二月遼延禧至應州金將婁室獲之

以歸遼耶律大石稱帝于起兒漫

遼主延禧如党項二月至應州金將婁室獲之以歸時耶律大石
會威武崇德會蕃新大林紫何馳等七州及大黃室韋敵刺王紀
刺茶赤刺也喜鼻古德尼刺達刺垂達密里密兒紀合主烏古里
阻卜普速完唐古忽毋思奚約紂而畢十八部王衆諭曰我祖宗
艱難創業歷世九主歷年二百金以臣屬逼我國家殘我黎庶屠
翦我州邑使我天祚皇帝蒙塵于外日夜痛心疾首我今仗義而
西欲借力諸酋翦我仇敵復我疆宇惟爾衆亦有軫我國家憂我

社稷思共救石父濟生民於難者乎遂得精兵萬餘置官吏立排
甲具器械乙巳二月甲午以青牛白馬祭天地祖宗整旅而西先
遺書回鶻王畢勒哥曰昔我太祖皇帝北征過卜古罕城卽遣使
至甘州詔爾祖烏毋諸曰汝思故國耶朕卽爲汝復之汝不能返
耶朕則有之在朕猶在爾也爾祖卽表謝以爲遷國于此十有餘
世軍民皆安土重遷不能復返矣是與爾國非一日之好也今我
將西至大食假道爾國其勿致疑畢勒哥得書卽迎至邸大晏三
日臨行獻馬六百馳百羊三千願質子孫爲附庸送至境外所過
敵者勝之降者安之兵行萬里歸者數國獲馳馬牛羊財物不可
勝計軍勢日盛銳氣日倍至尋思干西域諸國舉兵十萬號忽兒
珊來拒戰兩軍相望二里許諭將士曰彼軍多而無謀攻之則

首尾不救我師必勝遣六院司大王蕭幹三刺招討副使耶律松山等將兵二千五百攻其右樞密副使蕭刺阿不招討使耶律木薛等將兵二千五百攻其左自以衆攻其中三軍俱進忽兒珊大敗僵屍數十里駐軍尋思干凡九十日田田國王來降貢方物又西行至起兒漫羣臣共冊立大石爲帝以二月五日卽位在三十八號葛兒罕復上漢尊號曰天祐皇帝改元延慶

周氏曰時延禧旣獲遼祚已亡大石據有土地稱帝改元而必於延禧旣獲之後使遼之統緒不絕祀典有歸其志亦可嘉尚已然大石稱帝卽書于下者又以見大石有紹續本國之意故亦書而及之也其與五代漢劉崇稱帝于晉陽同意君子宜竝觀之

張氏曰觀大大石諭七州十八部王之言若有忠肝義膽恢復疆宇之志者也至於在道間關降附者衆似可以回轅東向以復不共戴天之讐今乃鼓行而西至于窮沙極漠之地何哉其心不過欲自帝耳于時東歸烏能帝哉故綱目書稱帝者所以著大石無君之心也

此論非是遼已亡矣大石安能東歸

高宗紹興元年

辛亥

夏四月金襲西遼曷董城不克

金聞耶律大石在和州之域恐與夏人合遣使索之夏國以境土不相接亦不知大石所往粘沒喝以耶律余覲遼之近族必知其巢穴以番漢及女真軍萬人付余覲使攻大石于漠北曷董城臨行質其妻子仍起燕雲河東夫運餉曷董去雲中三千餘里是行也三路之夫死者不可勝計

六年丙辰冬十月西遼耶律大石死

周氏曰太石前既稱帝此不書者不予其為帝也卒而書死外而貶之也綱目所謹者華戎之辨故其書法若此其旨嚴矣

仁宗皇帝夷列大石之子也

大石卒子夷列幼遺命其后蕭氏權國稱制七年死夷列立改元

紹興籍民十八歲以上者得八萬四千五百

紹興十六年丙寅冬十二月金遣使如西遼西遼殺之

先是回訖遣使入貢于金言耶律大石與其國鄰大石已死金遣粘割韓奴與其使俱往遼主遇之於野韓奴語不遜遼主怒而殺之

張氏曰遼金亦不共戴天者也殺金之使不亦宜乎

宗

遼耶律留哥自立為遼王章

耶律留哥故遼人仕金為北邊千戶

卮言曰留哥故遼宗室世系可攷

宋寧宗嘉定六年金至寧元年癸亥春二月故遼人耶律留哥取金遼東州郡

自立為遼王

時蒙古兵起金人疑遼遺民有他志耶律留哥不自安遁龍安聚眾至十餘萬自為都元帥遣使附于蒙古金遣胡沙率兵往攻之留哥大敗之遂自立為遼王改元元統盡有遼東州郡遂都咸

平

周氏曰書故遼人予義也遼為金賊不

乃能倡義復君

之地者亦綱目之所予留哥遼國之

地自立為王少

延遼國之祀豈不天可取哉故書予之

九年金貞祐夏四月遼王留哥降蒙古

遼王留哥降蒙古主以為元帥令居廣寧府



